

妙法蓮華經卷上

保寧勇禪師示看經警策文

夫看經之法。後學須知。當淨三業。若三業無虧。則百福俱集。三業者『身』『口』『意』也。

(一) 端身正坐。如對聖容。則身業淨也。

(二) 口無雜言。斷諸嬉笑。則口業淨也。

(三) 意不散亂。屏息萬緣。則意業淨也。

內心既寂。外境俱捐。方契悟於真源。庶研窮於法理。可謂水澄珠瑩。雲散月明。義海涌於胸襟。智嶽凝於耳目。軌莫容易。實非小緣。心法雙忘。自他俱利。若能如是。真報佛恩。

御製大乘妙法華經序

昔如來於耆闍崛山中。與大阿羅漢阿若憍陳如。摩訶迦
葉。無量等衆。演說大乘真經。名無量義。是時天雨寶
華。布覆充滿。慧光現端。洞燭幽顯。普佛世界六種震
動。一切人天得未曾有。咸皆歡喜讚歎。以爲是經。乃
諸佛如來祕密之藏。神妙叵測。廣大難名。所以拔滯溺
之沉流。拯昏迷之失性。功德弘遠。莫可涯涘。泝求其
源。肇彼竺乾。流於震旦。爰自西晉沙門。竺法護者初
如翻譯。名曰正法華。暨東晉龜茲三藏法師。鳩摩羅什
重翻。名曰妙法蓮華。至隋天竺沙門。闍那笈多所翻者
。亦名妙法。雖三經文理重沓互陳。而惟三藏法師獨得
其旨。第歷世既遠。不無訛謬。匪資刊正。漸致多疑。
用是特加讎校。仍命鏤梓以廣其傳。嗚呼。如來愍諸衆
生。有種種性。種種欲。種種行。種種憶想分別。歷劫
纏繞。無有出期。乃爲大事因緣現世。敷暢妙旨。作殊
勝方便。俾皆得度脫。超登正覺。此誠濟海之津梁。而

燭幽之慧炬也。善男子善女人一切衆生。能秉心至誠。持誦佩服。頂禮供養。卽離一切苦惱。除一切業障。解一切生死之厄。不啻如飢之得食。如渴之得飲。如寒之得火。如熱之得涼。如貧之得寶。如病之得醫。如子之得母。如渡之得舟。其爲快適欣慰。有不可言。噫。道非經無以寓。法非經無以傳。緣經以求法。緣法以悟道。方識是經之旨。清淨微妙第一希有。遵之者則身臻康泰。諸種善根圓滿具足。如蓮華出水。不染淤泥。卽得五蘊皆空。六根清淨。邁躋上善。以成於正覺者不難矣。苟或沉迷腸固。甘心墮落。絕滅善根。則身罹苦趣。輪回於生死之域者。其有紀極哉。雖然。善惡兩途。由人所趨。爲善獲吉。爲惡獲凶。幽明果報。不爽鎔銖。由觀於是經者。尚戒之哉。尚勉之哉。

妙法蓮華經品目

卷首

御製序明太宗文皇帝製

弘傳序唐沙門道宣述

大悲咒

卷一

序品第一

方便品第二

卷二

譬喻品第三

信解品第四

卷三

藥草喻品第五

授記品第六

化城喻品第七

卷四

五百弟子受記品第八
授學無學人記品第九

法師品第十

見寶塔品第十一

提婆達多品第十二

勸持品第十三

卷五

安樂行品第十四

從地湧出品第十五

如來壽量品第十六

分別功德品第十七

卷六

隨喜功德品第十八

法師功德品第十九

常不輕菩薩品第二十

如來神力品第二十一

囑累品第二十二
藥王菩薩本事品第二十三

卷七

妙音菩薩品第二十四

觀世音菩薩普門品第二十五

陀羅尼品第二十六

妙莊嚴王本事品第二十七

普賢菩薩勸發品第二十八

後序後秦沙門僧述

後跋天台佛隴敏曦跋



啓經香讚 講經起誦儀

爐香乍爇。法界蒙熏。諸佛海會悉遙聞。隨處結祥雲。

誠意方殷。諸佛現全身。

南無雲來集菩薩摩訶薩。第三稱齊坐。曰海會雲來集。唱

一品一編。

鍾聲傳三千界內。佛法揚萬億國中。

功勳祈世界和平。利益報檀那厚德。

南無本師釋迦牟尼佛。三稱

無上甚深微妙法。百千萬劫難遭遇。

我今見聞得受持。願解如來真實義。

妙法蓮華經弘傳序

妙法蓮華經者。甚深之奧藏。一化之根源。五時之極唱。如來出世本意。即說此經。開示衆生佛之知見。本源覺藏。究竟成佛也。奈小機未堪此聞。故佛先說四時權法。直待四十年後。方說此經。爲開九界之權。同歸佛道之實耳。妙法是法。蓮華是喻。妙名不可思議。法即十界十如。權實之法。良以妙法難解。假喻易明。蓮子喻果。華瓣是喻。因唯蓮華乃華果同開。以喻妙法。權實一體。因果同時也。九界是權。佛界是實。能解權實一體。即知生佛一如。明心見性。立地成佛也。弘傳序者。道宣律師。欲令此經。展轉廣大流傳無盡故作也。序者。次序。牆序。謂見東西牆。則別宅舍之內外。觀序則知一經之由致也。

唐終南山釋道宣述

唐。國朝名也。終南山。在陝西長安武功懸。其山北

來。勢終於南。故名終南。釋者。佛姓釋迦。其名牟
尼。凡歸佛出家。同名釋子也。律師諱道宣。京兆錢
氏子。父吏部尚書。母夢月輪貫懷而孕。生於隋開皇
間。又夢梵僧曰。所孕者梁祐律師也。及長。師日嚴
頽公出家。年二十依首師進具。唐高祖武德七年。居
終南紆麻蘭若。律行第一。常行般舟三昧。天人送饌
。高宗乾封二年入滅。懿宗朝謚澄照。述者。著述。
聖者作之。賢者述之。且述而不作。律師自謙也。

妙法蓮華經者。統諸佛降靈之本致也。

統者。總也。降靈。猶降神也。致趣也。諸佛皆從兜
率降神。出現於世。其本懷之致趣。莫不為衆生開示
悟入佛之知見。授記作佛而後已。諸佛出世之本意。
故云本致也。

蘊結大夏。出彼千齡。東傳震旦。三百餘載。

蘊結。卽結集也。大夏。竺國美稱。佛生於周昭王二十
十四年甲寅四月八日。示滅於穆王五十二年壬申二月
十五日。弟子阿難輩。結集大小經律論藏。至東漢明
帝永平七年。計一千餘年。故曰出彼千齡。齡年也。
是年帝夢金人長大。項有日光。飛至殿庭。旦問羣臣
。太學聞人傳毅奏曰。周昭王時。西域有佛出世。身
長丈六。而黃金色。陛下所夢。將非是乎。帝遣中朗
將蔡愔等十八人。往天竺求佛法。過月氏國。忽遇梵
僧摩騰法蘭二師。奉佛經像來震旦。遂同東還。永平
十年。入闕獻經像。帝大悅。雍門外立寺。以白馬馱
經而來。遂名白馬寺。騰蘭居焉。佛法自此流東土。
故曰東傳震旦。東方屬震。日出之方。故曰震旦。自
漢永平七年至獻帝。合一百五十五年歸魏。魏五主。
合四十五年歸西晉。西晉四主合五十二年。東晉至安
帝義熙二年。合八十九年。什師譯此經時。總計三百
四十一年。故曰三百餘載。載年也。唐虞曰載。取物

終更始也。

西晉惠帝永康年中。長安青門燉煌菩薩竺法護者。初翻此經。名正法華。

西晉武皇帝司馬炎。都洛陽。其第二子惠帝永康年間。長安古稱咸陽。漢高祖改名長安。今屬陝西。青門。在長安城東。卽秦邵平種瓜處。邵廣陵人。封東陵侯。秦亡爲布衣。種瓜於此。瓜有五色其美。燉煌卽今甘肅沙州路。漢爲燉煌郡。梵語竺曇摩羅刹。此云法護。月氏國人。究三十六國道術。兼通其語。秦泰始二年丙戌。自天竺達玉門。居燉煌。說法行道。世號燉煌菩薩。譯正法華經十卷。時在永康年中。世

東晉安帝隆安年中。後秦弘始。龜苓沙門鳩摩羅什次翻

此經。名妙法蓮華。

東晉司馬氏都建康。始元帝。終恭帝。共十一主合一

百三年。禪於宋。第十主安帝。隆安年中。後秦弘始八年夏。什師於長安逍遙園草堂寺。譯妙法蓮華經七卷。卽此部也。龜茲。西域國名。沙門。此云勤息。勤修戒定慧。息滅貪嗔癡。乃出家人之通稱也。鳩摩羅什。此云童壽。童時有老年之德故。少時日誦三萬二千言。隨母出家。徧遊西域。淹貫羣籍。尤善大乘。在龜茲日。諸王會同。每請師說法。必跪而聽。後居秦國。大闡經論。所譯出者。三百八十卷。秦主以師禮事之。才人侍奉甚虔。衆疑。師謂王曰。花鍼與米麪相配。其味甚美。王設麪齋。僧皆不能食。唯師獨食無礙。衆疑頓息。王臣士女。悉發菩提心。後爲語云。濟公噉鴿。羅什吞鍼。

隋氏仁壽。大興善寺。北天竺沙門闍那。笈多後所翻者。同名妙法。隋高祖文皇帝。姓楊名堅。弘農華陰人。受周禪。都

長安。國號隋。故云隋氏。仁壽。文帝年號也。天竺亦云印土。此云月。其土多出聖賢。如月照臨故。有東南西北中五。周九萬餘里。今云北者。卽五天竺國之一也。闍那笈多。二法師名。闍那具云闍那崛多。此云志德。北天竺刹帝利種。笈多具云達摩笈多。此云法密。南天竺人。隋仁壽元年。普曜寺僧上行。請二師於大興善寺。重譯此經爲八卷。名添品妙法蓮華。於晉秦兩譯添合改移有五。一於晉秦。譯本添普門品後偈頌。二於秦譯藥王品後補日光之全文。三合天授品於寶塔品內。四移囑累品於普賢品後。五回陀羅尼品於神力品後。又唐不空三藏法師譯法華軌儀全與添品經同。甚違什譯。

三經重沓。文旨互陳。時所宗尚。皆弘秦本。一經三譯。故云重沓。文詞旨趣。交互陳述。如十如是。晉譯則無。秦譯則有。又藥草喻後半品之文。晉

隋兩譯則有。秦譯則無。又囑累品。秦譯置二十二。隋譯則置之卷末。故云文旨互陳也。宗尊也。尚。高也。此經雖更三譯。然古今所尊尚者。唯傳弘羅什法師所譯之本。羅什法師七佛以來。於翻譯中最高第一。乃至賢劫千佛出世。亦為第一。

自餘支品。別偈不無其流。具如序曆。故所非述。

三譯之外。達摩提。於齊武永平年中。譯出提婆達品經一卷。又東晉祇密帝。譯普門品經一卷。支分各異。故云支品。又閻那崛多。譯出普門品重頌偈一卷。故曰別偈。如是品偈。雖支別不同。莫不各有源流。具如彼經本序。記其所自。故今所不述也。又言秦本之內。自多支品別偈。備如各品各偈之中。已自序曆可見。故今所不陳述也。蓋言一經之內。諸品為支品也。且律師作序。正為序於秦本。安得濫及別譯之品哉。讀者審之。

夫以靈嶽降靈。非大聖無由開化。適化所及。非昔緣無以導心。靈嶽降靈者。借用儒典。維嶽降靈生申及甫之意。蓋言靈山所化之機。皆蘊英靈之秀而降生者。自非吾佛大聖。神通駭動。智辨宣揚。則何由開導而化度之。此言應稱於機也。適化所及者。適當也。亦稱適也。謂雖大聖不能化無緣之人。如靈山所化之機。昔皆於大通佛世。聽王子覆講法華時。已下一乘之種。中間退大漸次調停。以至於今。方得妙悟。自非宿昔有緣種者。則無因開導其心。此言機稱於應也。

所以仙苑告成。機分小大之別。金河顧命。道殊半滿之科。豈非教被乘時。無足覈其高會。佛坐摩竭提國菩提樹下。成等正覺後。往至波羅奈國鹿野苑中。對陳如等五比丘說四諦教。初轉法輪。其

處因羣鹿所居。名曰鹿苑。以古仙所居。亦名仙苑。告成者。將自證之法轉向與人。令人修成道果。自他並證。故云告成。說法被機。機有利鈍。則大小不同。金河者。拘尸城外。有婆羅林側。是產閻浮金處。顧命者。臨終出命。故謂之顧。將去之意也。佛將入滅而垂言教。說涅槃經。如成王將終。作顧命之書。將涅槃時。追說四教。事同方等。藏爲半字教。通別圓爲滿字教。故曰道殊半滿之科。初言仙苑。後言金河者。蓋言一化次初後。以攝中間方等般若二時。故總結云教被乘時。上之華嚴。鹿苑。方等。般若。四時設教。雖則被機乘時。約部言之。皆屬於權。不足考覈其實。如法華之高會。唯談一實也。法華功高一化。理冠羣經。已今當說。最爲第一。律師之言。足可徵矣。又則一類鈍根。必經五時之機。非先乘四時之權訓。今則不能考入法華之高會。

是知五千退席。爲進增慢之儔。五百授記。俱崇密化之述。

方便品初。如來旣歎諸佛權實二智。甚深無量難解難入。舍利佛騰疑致請。如來誠許爲說。五千人等。便乃越席而去。如來斥言。此輩罪根深重。及增上慢。退亦佳矣。雖曰斥他。意在策進在座有增上慢者。不生退席之心。富樓那等。五百弟子。本是深位菩薩。今內祕外現。述示聲聞。至法華會上。復授成佛之記。蓋崇其密示輔佛行化之述也。

所以放光現瑞。開發請之教源。

序品中言。如來說無量義經已。入定放白毫光。具現六瑞。故使彌勒懷疑。以請文殊決答。是知放光現瑞。乃開發啓請說教之本源也。

出定揚德。暢佛慧之宏略。

方便品。如來從三昧安詳而起。讚揚諸佛權實二智之德。意令衆生開示悟入佛之知見。則佛慧之宏遠方略。方乃通暢也。佛慧。卽佛權實二智。五眼圓見也。

朽宅通入大之文軌。

朽宅。喻三界生死。入大。卽由三車引入大白牛車。喻由三乘歸一佛乘。文軌。喻法華爲開權顯實之妙法也。是以譬喻品中。初以三車誘引諸子。及出火宅後。乃等賜大車。以喻鹿苑初爲聲聞等。權說緣度三乘之法。令其修習。出於三界。逮至法華。開權顯實。唯談一乘圓實之法。咸令開示悟入佛之知見。故經云。如來初以三乘引導衆生。然後但以大乘而度脫之。譬天下大治之時。書同文。車同軌。約法則同圓教一實之文。約喻則同大車一乘之軌。豈非朽故火宅之喻。乃是引小向大之說。故云通入大之文軌。

化城引昔緣之不墜。

化城。無條曰化。防非禦敵曰城。以喻小乘真空涅槃。防見思煩惱之非。禦三界生死之敵也。化城喻品。有一導師。將諸衆人經過險道。五百由旬。欲至寶所。衆人中路。疲極欲退。導師於三百由旬外。化作一城。暫爲止息。然後令至寶所。導師喻佛。衆人喻二乘之機。險道喻三界生死。五百由旬。總喻三惑煩惱。一見思惑。爲三界內煩惱。喻三百。二塵沙惑。三無明惑。爲三界外煩惱。各喻一百。是爲五百由旬。出此五百。卽到寶所。寶所喻佛果。蓋以佛見二乘之機。聞大則退。聞小卽進。故於三界外權說二乘果證。後令入佛。故曰化城。引昔緣不墜者。佛昔爲王子時。復講法華。彼時聞者。昔下大乘善種。中間退大向小故。由是及今。小機先熟。王子於今。旣成佛道。先爲權說小法。令證二乘之果。不發大心。如止化城。及說法華。方入佛道。授成佛記。豈非化城之喻。

。乃引宿昔大乘緣種耶。故云不墜。

繫珠明理性之常在。

五百弟子授記品。陳如等得記佛後。悔過自責。乃以繫珠爲喻。以陳領解。珠譬實相之理。乃大乘緣種也。蓋佛昔於大通佛世。嘗以大法教令發心。爲下一乘之種。多劫廢忘。不知不覺。今得法華授記。方知緣種不失。理性常在。譬人至親友家。親友以珠繫其衣內。其人醉臥不覺。及後親友復爲示之。卽知衣內之珠不失。以喻理性之常在也。

鑿井顯示悟之多方。

法師品佛說譬如有人渴乏須水。穿鑿高原。猶見乾土。知水尚遠。施工不已。轉見濕土。其心決定。知水必近。以喻在家出家之人。若未聞解思惟。修習此經。是人去阿耨菩提尚遠。若得聞解思惟。修習此經。

必知是人得近阿耨菩提。佛以種種方便教化。方乃悟入。故云示悟之多方。

詞義宛然。喻陳惟遠。

文詞義理。宛然符合。加以如上種種比喻敷陳。則一經之旨。獨惟幽遠也。

自非大哀曠濟。拔滯溺之沈流。一極悲心拯昏迷之失性。

。衆生滯著諸有。沒溺愛河。此等之流。自非如來與大哀憐。廣爲津濟。安能拔其生死之苦。令得涅槃之樂。又衆爲無明所覆。昏迷迷倒。自非如來等一至極悲愍之心。安能拯其昏迷之暗。令復本性之明也。

自漢至唐。六百餘載。總曆羣籍。四千餘軸。受持盛者。無出此經。

自漢永平十年。佛教始流東土。至東晉合三百五十二年。又宋五十九年。又齊三十三年。又梁五十五年。又陳三十三年。又隋三十七年。又唐高祖至高宗乾封二年。律師入滅。合五十年。總計六百九年。故云六百餘載。但莫考律師於唐代何年作此序耳。六百餘載之內。總經譯出諸經卷目。雖有四千餘軸之多。今昔受持之盛者。莫出什師所譯之法華也。

將非機教相扣。並智勝之遺塵。聞而深敬。俱威王之餘勳。

機教相扣者。機卽所化之機。教則能被之教。扣。擊也。謂機必稟教。教必被機。機教互相擊動也。且稟教之機。並昔從大通智勝佛所。同一下乘種子。其上根利智者。於初大間。已得道竟。其鈍根者。中間退大以來。佛爲節節調停。至今王城。亦得道竟。後之受持此經者。將非昔同下種最鈍之人乎。望前之多。

比今之少。有若遺塵。故云智勝之遺塵。又若聞此經。信敬不疑。謗者。乃是威音王佛所。不輕爲下大乘緣。種之餘功故也。

軌於經首。序而綜之。

軌。專也。綜。卽機縷之持絲制經者。律師專於此經之首。述爲序文。綜括一經之大旨。庶使誦持者。知義意之有歸。法喻之相顯。譬若機縷之持絲制經。令其倏然有緒。而不紊亂也。

庶得早淨六根。仰慈尊之嘉會。速成四德。趣土之玄猷。

此謂誦持之人。苟知一經之大旨。念念從聞思修。依解立行。自然獲得六根清淨。則能見佛常在靈山。如隋智者大師行法華三昧。誦經至藥王品。是真精進。是名真法供養如來。卽豁然大悟。見靈山一會。儼然

弘

贊莫窮。永貽諸後。云爾。

未散。故經云。若有深心信解。則爲見佛。常在耆山等。或云慈尊指彌勒也。普賢勸發品云。若有受持讀誦。解其義趣。乃至云卽往兜率天上彌勒菩薩所。二說俱通。速成四德者。謂常樂我淨也。不遷不變謂之常。離二死苦謂之樂。八大自在謂之我。三惑淨盡謂之淨。旣成就四德。必得往生極樂國土。故經云。如說修行。於此命終。卽往安樂世界。阿彌陀佛。大菩薩衆。圍繞住處。趣。向也。猷。道也。道卽能通之義。謂因此玄妙之道。卽能通至阿彌陀佛極樂世界。

贊。助也。貽。遺也。律師作序之意。蓋欲贊助此經。永遺後代。冀展轉流通。無窮無盡也。或問。法華本述二妙。律師何但序述。而不言本。今爲答曰。若知從本垂迹。卽知因迹顯。本故荆溪尊者云。若解迹妙。本妙非遙。本迹雖殊。不思議一。

妙法華經弘傳序。

光緒丙申春。寧海縣屠君祖昭。資刻法華經版告成。將印刷流通。請說於曦。曦辭焉而不獲。乃請於屠君曰。此乃弘傳序。南山律師所作。總攝法華經全部二十八品靈文。其義幽深。其詞奧妙。吾亦如戴天履海。莫識高深。唯將天竺一如法師註解。以淺況深。略采註腳。以便讀者。若為發露底蘊。為佛傳燈。則吾豈敢。天台山佛隴真覺寺敏曦謹識。

香讚

爐香乍爇。法界蒙熏。諸佛海會悉遙聞。隨處結祥雲。誠意方殷。諸佛現全身。

南無香雲蓋菩薩摩訶薩。三稱

千手千眼無礙大悲心陀羅尼
南無喝囉怛那哆囉夜耶。南無阿唎耶。婆盧羯帝爍鉢囉
耶。菩提薩埵娑耶。摩訶薩埵婆耶。摩訶迦盧尼迦耶。
唵。薩皤囉罰曳。數怛那怛寫。南無悉吉栗埵伊蒙阿唎
耶。婆盧吉帝室。佛囉楞馱姿。南無那囉謹墀。唎摩訶
皤哆沙咩。薩婆阿他豆輸朋。阿逝孕。薩婆薩哆那摩婆
薩哆那摩婆伽。摩罰特豆。怛姪他。唵阿婆盧醯盧迦帝
。迦羅帝。夷醯唎。摩訶菩提薩埵。薩婆薩婆。摩囉摩
囉。摩醯摩醯唎馱孕。俱盧俱盧羯蒙。度盧度盧罰闍耶
帝。摩訶罰闍耶帝。陀羅陀羅。地唎尼。室佛囉耶。遮
囉遮囉。摩摩罰摩囉。穆帝隸。伊醯伊醯。室那室那。
阿囉唵佛囉舍利。罰沙罰唵。佛囉舍耶。呼盧呼盧摩囉
。呼盧呼盧醯唎。娑囉娑囉。悉唎悉唎。蘇盧蘇盧。菩
提夜菩提夜。菩馱夜菩馱夜。彌帝唎夜。那囉謹墀。地
唎瑟尼那。波夜摩那。娑婆訶。悉陀夜娑婆訶。摩訶悉
陀夜。娑婆訶。悉陀喻藝。室皤囉夜娑婆訶。那囉謹

墀。娑婆訶。娑婆訶。摩羅那羅。娑婆訶。悉囉僧阿穆佉耶。娑婆訶。娑婆摩訶阿悉陀耶。娑婆訶。者吉囉阿悉陀夜。娑婆訶。波陀摩羯悉哆夜。娑婆訶。那囉謹墀皤伽囉耶。娑婆訶。摩婆利勝羯囉夜。娑婆訶。南無喝囉怛那哆囉夜耶。南無阿唎耶婆盧吉帝。爍皤囉夜。娑婆訶。唵。悉殿都。漫哆囉。跋馱耶。娑婆訶。

讚佛偈

容顏甚奇妙。光明照十方。我適曾供養。今復還親覲。聖主天中王。迦陵頻伽聲。哀愍衆生者。我等今敬禮。南無本師釋迦牟尼佛。三稱

開經偈

無上甚深微妙法。百千萬年難遭遇。我今見聞得受持。願解如來真實義。

妙法蓮華經卷第一
五。無四上斷醍醐生為救相用。此經實相為五體。玄義一。乘一。因法果為宗。

姚秦三藏法師鳩摩羅什奉詔譯

妙法蓮華經序品第一
宗。乃為開發正。全經分序。正流通三分。由序。述此義。

如是我聞。一時佛住王舍城。耆闍崛山中。與大比丘眾萬二千人俱。皆是阿羅漢。諸漏已盡。無復煩惱。逮得己利。盡諸有結。心得自在。其名曰。阿若憍陳如。摩訶迦葉。優樓頻螺迦葉。伽耶迦葉。那提迦葉。舍利弗。大目犍連。摩訶迦旃延。阿菟樓駄。劫賓那。憍梵波提。離婆多。畢陵伽婆蹉。薄拘羅。摩訶拘絺羅。難陀。孫陀羅難陀。富樓那彌多羅尼子。須菩提。阿難。羅睺羅。如是眾所知識。大阿羅漢等。

復有學。無學。二千人。摩訶波闍波提比丘尼。與眷屬六千人俱。羅睺羅母。耶輸陀羅比丘尼。亦與眷屬俱。菩薩摩訶薩八萬人。皆於阿耨多羅三藐三菩提不退轉。皆得陀羅尼。樂說辯才。轉不退轉法輪。供養無量百千諸佛。於諸佛所。植衆德本。常爲諸佛之所稱歎。以慈修身。善入佛慧。通達大智。到於彼岸。名稱普聞無量世界。能度無數百千衆生。其名曰。文殊師利菩薩。觀世音菩薩。得大勢菩薩。常精進菩薩。不休息菩薩。寶掌菩薩。藥王菩薩。勇施菩薩。寶月菩薩。月光菩薩。滿月菩薩。大力菩薩。無量力菩薩。越三界菩薩。跋陀婆羅菩薩。彌勒菩薩。寶積菩薩。導師菩薩。如是等菩薩摩訶薩八萬人俱。

爾時釋提桓因。與其眷屬二萬天子俱。復有名月天子。普香天子。寶光天子。四大天王。與其眷屬萬天子俱。

自在天子。大自在天子。與其眷屬三萬天子俱。娑婆世界主。梵天王。尸棄大梵。光明大梵等。與其眷屬萬二千天子俱。有八龍王。難陀龍王。跋難陀龍王。娑伽羅龍王。和修吉龍王。德叉迦龍王。阿那婆達多龍王。摩那斯龍王。優鉢羅龍王等。各與若干百千眷屬俱。有四緊那羅王。法緊那羅王。妙法緊那羅王。大法緊那羅王。持法緊那羅王。各與若干百千眷屬俱。有美乾闥婆王。樂乾闥婆王。樂音乾闥婆王。美乾闥婆王。婆王。各與若干百千眷屬俱。有四阿修羅王。婆羅王。法羅騫馱阿修羅王。毘摩質多羅阿修羅王。羅阿修羅王。各與若干百千眷屬俱。有阿迦樓羅王。大威德迦樓羅王。大身迦樓羅王。大滿迦樓羅王。如意迦樓羅王。各與若干百千眷屬俱。韋提希子阿闍世王。與若干百千眷屬俱。各禮佛足。退坐一面。

去至品盡名別序。與前四時諸經不同。此序會古今。授佛出世度人。從究竟開權顯實。令諸弟子同佛知見。便記作佛也。正宗分。方。

爾時世尊。四衆圍繞。供養。恭敬。尊重。讚歎。爲諸菩薩說大乘經。名無量義。教菩薩法。佛所護念。佛說此經已。結跏趺坐。入於無量義處三昧。身心不動。是時天雨曼陀羅華。摩訶曼陀羅華。曼殊沙華。摩訶曼殊沙華。而散佛上。及諸大衆。普佛世界。六種震動。

爾時會中。比丘。比丘尼。優婆塞。優婆夷。天龍。夜叉。乾闥婆。阿修羅。迦樓羅。緊那羅。摩睺羅伽。人非人。及諸小王。轉輪聖王。是諸大衆。得未曾有。歡喜合掌。一心觀佛。

爾時佛放眉間白毫相光。照東方萬八千世界。靡不周徧。下至阿鼻地獄。上至阿迦尼吒天。於此世界。盡見彼土六趣衆生。又見彼土現在諸佛。及聞諸佛所說經法。并見彼諸比丘。比丘尼。優婆塞。優婆夷。諸修行得道。

者。復見諸菩薩摩訶薩。種種因緣。種種信解。種種相貌。行菩薩道。復見諸佛般涅槃者。復見諸佛般涅槃後。以佛舍利。起七寶塔。

爾時彌勒菩薩作是念。今者。世尊現神變相。以何因緣而有此瑞。今佛世尊入於三昧。是不可思議。現稀有事。當以問誰。誰能答者。復作此念。是文殊師利。法王之子。已曾親近供養過去無量諸佛。必應見此稀有之相。我今當問。

爾時比丘。比丘尼。優婆塞。優婆夷。及諸天龍。鬼神等。咸作此念。是佛光明神通之相。今當問誰。爾時彌勒菩薩欲自決疑。又觀四衆比丘。比丘尼。優婆塞。優婆夷。及諸天龍。鬼神。等。衆會之心。而問文殊師利言。以何因緣。而有此瑞。神通之相。放大光明。

。照於東方萬八千土。悉見彼佛國界莊嚴。
於是彌勒菩薩欲重宣此義。以偈問曰。
文殊師利。導師何故。眉間白毫。大光普照。
雨曼陀羅。曼殊沙華。栴檀香風。悅可衆心。
以是因緣。地皆嚴淨。而此世界。六種震動。
時四部衆。咸皆歡喜。身意快然。得未曾有。
眉間光明。照於東方。萬八千土。皆如金色。
從阿鼻獄。上至有頂。諸世界中。六道衆生。
生死所趣。善惡業緣。受報好醜。於此悉見。
又覩諸佛。聖主師子。演說經典。微妙第一。
其聲清淨。出柔軟音。教諸菩薩。無數億萬。
梵音深妙。令人樂聞。各於世界。講說正法。
種種因緣。以無量喻。照明佛法。開悟衆生。
若人遭苦。厭老病死。爲說涅槃。盡諸苦際。
若人有福。曾供養佛。志求勝法。爲說緣覺。

若有佛子。修種種行。求無上慧。爲說淨道。
文殊師利。我住於此。見聞若斯。及千億事。
如是衆多。今當略說。我見彼土。恆沙菩薩。
種種因緣。而求佛道。或有行施。金銀珊瑚。
眞珠摩尼。碑磔瑪瑙。金剛諸珍。奴婢車乘。
寶飾輦輿。歡喜布施。迴向佛道。願得是乘。
三界第一。諸佛所歎。或有菩薩。駟馬寶車。
欄楯華蓋。軒飾布施。復見菩薩。身肉手足。
及妻子施。求無上道。又見菩薩。頭目身體。
欣樂施與。求佛智慧。文殊師利。我見諸王。
往詣佛所。問無上道。便捨樂土。宮殿臣妾。
剃除鬚髮。而被法服。或見菩薩。而作比丘。
獨處閒靜。樂誦經典。又見菩薩。勇猛精進。
入於深山。思惟佛道。又見離欲。常處空閒。
深修禪定。得五神通。又見菩薩。安禪合掌。
以千萬偈。讚諸法王。復見菩薩。智深志固。

能問諸佛。聞悉受持。又見佛子。定慧具足。
以無量喻。爲衆講法。欣樂說法。化諸菩薩。
破魔兵衆。而擊法鼓。又見菩薩。寂然宴默。
天龍恭敬。不以爲喜。又見菩薩。處林放光。
濟地獄苦。令入佛道。又見佛子。未嘗睡眠。
經行林中。勤求佛道。又見具戒。威儀無缺。
淨如寶珠。以求佛道。又見佛子。住忍辱力。
增上慢人。惡罵捶打。皆悉能忍。以求佛道。
又見菩薩。離諸戲笑。及癡眷屬。親近智者。
一心除亂。攝念山林。億千萬歲。以求佛道。
或見菩薩。肴膳飲食。百種湯藥。施佛及僧。
名衣上服。價值千萬。或無價衣。施佛及僧。
千萬億種。栴檀寶舍。衆妙臥具。施佛及僧。
清淨園林。華果茂盛。流泉浴池。施佛及僧。
如是等施。種種微妙。歡喜無厭。求無上道。
或有菩薩。說寂滅法。種種教詔。無數衆生。

或見菩薩。觀諸法性。無有二相。猶如虛空。
又見佛子。心無所著。以此妙慧。求無上道。
文殊師利。又有菩薩。佛滅度後。供養舍利。
又見佛子。造諸塔廟。無數恒沙。嚴飾國界。
寶塔高妙。五千由旬。縱廣正等。二千由旬。
一一塔廟。各千幢旛。珠交露幔。寶鈴和鳴。
諸天龍神。人及非人。香華伎樂。常以供養。
文殊師利。諸佛子等。爲供舍利。嚴飾塔廟。
國界自然。殊特妙好。如天樹王。其華開敷。
佛放一光。我及衆會。見此國界。種種殊妙。
諸佛神力。智慧稀有。放一淨光。照無量國。
我等見此。得未曾有。佛子文殊。願決衆疑。
四衆欣仰。瞻仁及我。世尊何故。放斯光明。
佛子時答。決疑令喜。何所饒益。演斯光明。
佛坐道場。所得妙法。爲欲說此。爲當授記。
示諸佛土。衆寶嚴淨。及見諸佛。此非小緣。

文殊當知。四衆龍神。瞻察仁者。爲說何等。

爾時文殊師利語彌勒菩薩摩訶薩。及諸大士。善男子等。
。如我惟忖。今佛世尊欲說大法。雨大法雨。吹大法螺。
。擊大法鼓。演大法義。諸善男子。我於過去諸佛。曾
見此瑞。放斯光已。卽說大法。是故當知今佛現光。亦
復如是。欲令衆生。咸得聞知一切世間難信之法。故現
斯瑞。諸善男子。如過去無量無邊不可思議阿僧祇劫。
爾時有佛。號日月燈明如來。應供。正徧知。明行足。
善逝。世間解。無上士。調御丈夫。天人師。佛。世尊。
。演說正法。初善。中善。後善。其義深遠。其語巧妙。
。純一無雜。具足清白梵行之相。爲求聲聞者。說應四
諦法。度生老病死。究竟涅槃。爲求辟支佛者。說應十
二因緣法。爲諸菩薩。說應六波羅蜜。令得阿耨多羅三
藐三菩提。成一切種智。

次復有佛。亦名日月燈明。次復有佛。亦名日月燈明。如是二萬佛。皆同一字。號日月燈明。又同一姓。姓頗羅墮。彌勒當知。初佛後佛。皆同一字。名日月燈明。十號具足。所可說法。初中後善。其最後佛。未出家時。有八王子。一名有意。二名善意。三名無量意。四名寶意。五名增意。六名除疑意。七名響意。八名法意。是八王子。威德自在。各領四天下。是諸王子。聞父出家。得阿耨多羅三藐三菩提。悉捨王位。亦隨出家。發大乘意。常修梵行。皆爲法師。已於千萬佛所。植諸善本。

是時日月燈明佛說大乘經。名無量義教菩薩法。佛所護念。說是經已。卽於大衆中。結跏趺坐。入於無量義處三昧。身心不動。是時。天雨曼陀羅華。摩訶曼陀羅華。曼殊沙華。摩訶曼殊沙華。而散佛上。及諸大衆。普佛世界。六種震動。爾時會中。比丘。比丘尼。優婆塞。

。優婆夷。天龍。夜叉。乾闥婆。阿修羅。迦樓羅。緊那羅。摩睺羅伽。人非人。及諸小王。轉輪聖王。等。是諸大衆。得未曾有。歡喜合掌。一心觀佛。

爾時如來放眉間白毫相光。照東方萬八千佛土。靡不周徧。如今所見。是諸佛土。彌勒當知。爾時會中。有二。十億菩薩。樂欲聽法。是諸菩薩。見此光明。普照佛土。得未曾有。欲知此光所爲因緣。時有菩薩。名曰妙光。有八百弟子。是時日月燈明佛從三昧起。因妙光菩薩。說大乘經。名妙法蓮華教菩薩法。佛所護念。六十小劫。不起於座。時會聽者。亦坐一處。六十小劫。身心不動。聽佛所說。謂如食頃。是時衆中。無有一人。若身若心而生懈倦。

日月燈明佛於六十小劫說是經已。卽於梵。魔。沙門。婆羅門。及天。人。阿修羅。衆中。而宣此言。如來於

今日中夜。當入無餘涅槃。時有菩薩。名曰德藏。日月
燈明佛卽授其記。告諸比丘。是德藏菩薩。次當作佛。
號曰淨身。多陀阿伽度。阿羅訶。三藐三佛陀。佛授記
已。便於中夜。入無餘涅槃。佛滅度後。妙光菩薩持妙
法蓮華經。滿八十小劫。爲人演說。日月燈明佛八子。
皆師妙光。妙光教化。令其堅固阿耨多羅三藐三菩提。
是諸王子。供養無量百千萬億佛已。皆成佛道。其最後
成佛者。名曰燃燈。八百弟子中。有一人。號曰求名。
貪著利養。雖復讀誦衆經。而不通利。多所忘失。故號
求名。是人亦以種諸善根因緣故。得值無量百千萬億諸
佛。供養。恭敬。尊重。讚歎。

彌勒當知。爾時妙光菩薩。豈異人乎。我身是也。求名
菩薩。汝身是也。今見此瑞。與本無異。是故惟忖。今
日如來當說大乘經。名妙法蓮華。教菩薩法。佛所護念
。爾時文殊師利於大衆中。欲重宣此義。而說偈言。

我念過去世。無量無數劫。有佛人中尊。號日月燈明。
世尊演說法。度無量衆生。無數億菩薩。令入佛智慧。
佛未出家時。所生八王子。見大聖出家。亦隨修梵行。
時佛說大乘。經名無量義。於諸大衆中。而爲廣分別。
佛說此經已。卽於法座上。跏趺坐三昧。名無量義處。
天雨曼陀華。天鼓自然鳴。諸天龍鬼神。供養人中尊。
一切諸佛土。卽時大震動。佛放眉間光。現諸稀有事。
此光照東方。萬八千佛土。示一切衆生。生死業報處。
有見諸佛土。以衆寶莊嚴。琉璃玻瓈色。斯由佛光照。
及見諸天人。龍神夜叉衆。乾闥緊那羅。各供養其佛。
又見諸如來。自然成佛道。身色如金山。端嚴甚微妙。
如淨琉璃中。內現眞金像。世尊在大衆。敷演深法義。
一一諸佛土。聲聞衆無數。因佛光所照。悉見彼大衆。
或有諸比丘。在於山林中。精進持淨戒。猶如護明珠。
又見諸菩薩。行施忍辱等。其數如恒沙。斯由佛光照。

又見諸菩薩。深入諸禪定。身心寂不動。以求無上道。
又見諸菩薩。知法寂滅相。各於其國土。說法求佛道。
爾時四部衆。見日月燈佛。現大神通力。其心皆歡喜。
各各自相問。是事何因緣。天人所奉尊。適從三昧起。
讚妙光菩薩。汝爲世間眼。一切所歸信。能奉持法藏。
如我所說法。唯汝能證知。世尊旣讚歎。令妙光歡喜。
說是法華經。滿六十小劫。不起於此座。所說上妙法。
是妙光法師。悉皆能受持。佛說是法華。令衆歡喜已。
尋卽於是日。告於天人衆。諸法實相義。已爲汝等說。
我今於中夜。當入於涅槃。汝一心精進。當離於放逸。
諸佛甚難值。億劫時一遇。世尊諸子等。聞佛入涅槃。
各各懷悲惱。佛滅一何速。聖主法之王。安慰無量衆。
我若滅度時。汝等勿憂怖。是德藏菩薩。於無漏實相。
心已得通達。其次當作佛。號曰爲淨身。亦度無量衆。
佛此夜滅度。如薪盡火滅。分佈諸舍利。而起無量塔。
比丘比丘尼。其數如恆沙。倍復加精進。以求無上道。

是妙光法師。奉持佛法藏。八十小劫中。廣宣法華經。
 是諸八王子。妙光所開化。堅固無上道。當見無數佛。
 供養諸佛已。隨順行大道。相繼得成佛。轉次而授記。
 最後天中天。號曰燃燈佛。諸仙之導師。度脫無量衆。
 是妙光法師。時有一弟子。心常懷懈怠。貪著於名利。
 求名利無厭。多遊族姓家。棄捨所習誦。廢忘不通利。
 以是因緣故。號之爲求名。亦行衆善業。得見無數佛。
 供養於諸佛。隨順行大道。具六波羅蜜。今見釋師子。
 其後當作佛。號名曰彌勒。廣度諸衆生。其數無有量。
 彼佛滅度後。懈怠者汝是。妙光法師者。今則我身是。
 我見燈明佛。本光瑞如此。以是知今佛。欲說法華經。
 今相如本瑞。是諸佛方便。今佛放光明。助發實相義。
 諸人今當知。合掌一心待。佛當雨法雨。充足求道者。
 諸求三乘人。若有疑悔者。佛當爲除斷。令盡無有餘。
 序分竟。方便無學。八品別。爲十品。爲正宗。讚諸佛。又曰。
 方便至學。無學。八品。別。爲十品。爲正宗。讚諸佛。又曰。
 實二智。直說。法體。上根。舍利。悟得。記。利。初。讚。諸。佛。權。曰。
 三請。直說。法體。上根。舍利。悟得。記。利。初。讚。諸。佛。權。曰。

妙法蓮華經方便品第二

四方十。餘祕年祕。而便不。顯妙也。至。方佛彰說

。為上根直說法體
。乃法說一周。

爾時。世尊從三昧安詳而起。告舍利弗。諸佛智慧。甚深無量。其智慧門。難解難入。一切聲聞。辟支佛。所不能知。所以者何。佛曾親近百千萬億無數諸佛。盡行諸佛無量道法。勇猛精進。名稱普聞。成就甚深未曾有法。隨宜所說。意趣難解。舍利弗。吾從成佛已來。種種因緣。種種譬喻。廣演言教。無數方便。引導衆生。令離諸著。所以者何。如來方便知見波羅蜜。皆已具足。舍利弗。如來知見。廣大深遠。無量無礙。力無所畏。禪定。解脫三昧。深入無際。成就一切未曾有法。舍利弗。如來能種種分別。巧說諸法。言辭柔軟。悅可衆心。舍利弗。取要言之。無量無邊未曾有法。佛悉成就。止。舍利弗。不須復說。所以者何。佛所成就第一稀

有難解之法。唯佛與佛。乃能究盡諸法實相。所謂諸法。如是相。如是性。如是體。如是力。如是作。如是因。如是緣。如是果。如是報。如是本末究竟等。

爾時世尊欲重宣此義。而說偈言。

世雄不可量。諸天及世人。一切衆生類。無能知佛者。佛力無所畏。解脫諸三昧。及佛諸餘法。無能測量者。本從無數佛。具足行諸道。甚深微妙法。難見難可了。於無量億劫。行此諸道已。道場得成果。我已悉知見。如是大果報。種種性相義。我及十方佛。乃能知是事。是法不可示。言辭相寂滅。諸餘衆生類。無有能得解。除諸菩薩衆。信力堅固者。諸佛弟子衆。曾供養諸佛。一切漏已盡。住是最後身。如是諸人等。其力所不堪。假使滿世間。皆如舍利弗。盡思共度量。不能測佛智。正使滿十方。皆如舍利弗。及餘諸弟子。亦滿十方刹。盡思共度量。亦復不能知。辟支佛利智。無漏最後身。

亦滿十方界。其數如竹林。斯等共一心。於億無量劫。欲思佛實智。莫能知少分。新發意菩薩。供養無數佛。了達諸義趣。又能善說法。如稻麻竹葦。充滿十方刹。一心以妙智。於恆河沙劫。咸皆共思量。不能知佛智。不退諸菩薩。其數如恆沙。一心共思求。亦復不能知。又告舍利弗。無漏不思議。甚深微妙法。我今已具得。惟我知是相。十方佛亦然。舍利弗當知。諸佛語無異。於佛所說法。當生大信力。世尊法久後。要當說真實。告諸聲聞衆。及求緣覺乘。我令脫苦縛。速得涅槃者。佛以方便力。示以三乘教。衆生處處著。引之令得出。

爾時大衆中。有諸聲聞漏盡阿羅漢阿若憍陳如。等。千二百人。及發聲聞辟支佛心。比丘。比丘尼。優婆塞。優婆夷。各作是念。今者。世尊何故慇懃稱歎方便。而作是言。佛所得法。甚深難解。有所言說。意趣難知。一切聲聞。辟支佛。所不能及。佛說一解脫義。我等亦

得此法。到於涅槃。而今不知是義所趣。

爾時舍利弗知四衆心疑。自亦未了。而白佛言。世尊。何因何緣。慇懃稱歎諸佛第一方便。甚深微妙。難解之法。我自昔來。未曾從佛。聞如是說。今者。四衆咸皆有疑。惟願世尊敷演斯事。世尊何故慇懃稱歎甚深微妙難解之法。

爾時舍利弗欲重宣此義。而說偈言。慧日大聖尊。久乃說是法。自說得如是。力無畏三昧。禪定解脫等。不可思議法。道場所得法。無能發問者。我意難可測。亦無能問者。無問而自說。稱歎所行道。智慧甚微妙。諸佛之所得。無漏諸羅漢。及求涅槃者。今皆墮疑網。佛何故說是。其求緣覺者。比丘比丘尼。諸天龍鬼神。及乾闥婆等。相視懷猶豫。瞻仰兩足尊。是事爲云何。願佛爲解說。於諸聲聞衆。佛說我第一。

我今自於智。疑惑不能了。爲是究竟法。爲是所行道。佛口所生子。合掌瞻仰待。願出微妙音。時爲如實說。諸天龍神等。其數如恆沙。求佛諸菩薩。大數有八萬。又諸萬億國。轉輪聖王至。合掌以敬心。欲聞具足道。

爾時佛告舍利弗。止。止。不須復說。若說是事。一切世間諸天。及人。皆當驚疑。舍利弗重白佛言。世尊。惟願說之。惟願說之。所以者何。是會無數百千萬億阿僧祇衆生。曾見諸佛。諸根猛利。智慧明了。聞佛所說。則能敬信。

爾時舍利弗欲重宣此義。而說偈言。法王無上尊。惟說願勿慮。是會無量衆。有能敬信者。佛復止舍利弗。若說是事。一切世間天。人。阿修羅。皆當驚疑。增上慢比丘。將墜於大坑。

爾時世尊重說偈言。
止止不須說。我法妙難思。諸增上慢者。聞必不敬信。

爾時舍利弗重白佛言。世尊。惟願說之。惟願說之。今此會中。如我等比。百千萬億。世世已曾從佛受化。如此人等。必能敬信。長夜安隱。多所饒益。

爾時舍利弗欲重宣此義。而說偈言。
無上兩足尊。願說第一法。我爲佛長子。惟垂分別說。
是會無量衆。能敬信此法。佛已曾世世。教化如是等。
皆一心合掌。欲聽受佛語。我等千二百。及餘求佛者。
願爲此衆故。惟垂分別說。是等聞此法。則生大歡喜。
爾時世尊告舍利弗。汝已慇懃三請。豈得不說。汝今諦聽。善思念之。吾當爲汝分別解說。說此語時。會中有

比丘。比丘尼。優婆塞。優婆夷。五千人等。卽從座起。禮佛而退。所以者何。此輩罪根深重。及增上慢。未得謂得。未證謂證。有如此失。是以不住。世尊默然而不制止。

爾時佛告舍利弗。我今此衆。無復枝葉。純有貞實。舍利弗。如是增上慢人。退亦佳矣。汝今善聽。當爲汝說。舍利弗言。唯。然。世尊。願樂欲聞。佛告舍利弗。如是妙法。諸佛如來。時乃說之。如優曇鉢華。時一現耳。舍利弗。汝等當信佛之所說。言不虛妄。舍利弗。諸佛隨宜說法。意趣難解。所以者何。我以無數方便。種種因緣。譬喻言辭。演說諸法。是法。非思量分別之所能解。唯有諸佛乃能知之。所以者何。諸佛世尊唯以一大事因緣故。出現於世。舍利弗。云何名諸佛世尊唯以一大事因緣故。出現於世。諸佛世尊欲令衆生開佛知見。使得清淨故。出現於世。欲示衆生。佛之知見故。

出現於世。欲令衆生悟佛知見故。出現於世。欲令衆生
入佛知見道故。出現於世。舍利弗。是爲諸佛以一大事
因緣故。出現於世。佛告舍利弗。諸佛如來但教化菩薩
。諸有所作。常爲一事。唯以佛之知見。示悟衆生。舍
利弗。如來。但以一佛乘故。爲衆生說法。無有餘乘。
若二。若三。舍利弗。一切十方諸佛。法亦如是。
舍利弗。過去諸佛。以無量無數方便。種種因緣。譬喻
言辭。而爲衆生演說諸法。是法。皆爲一佛乘故。是諸
衆生。從諸佛聞法。究竟皆得一切種智。舍利弗。未來
諸佛。當出於世。亦以無量無數方便。種種因緣。譬喻
言辭。而爲衆生演說諸法。是法。皆爲一佛乘故。是諸
衆生。從佛聞法。究竟皆得一切種智。舍利弗。現在十
方無量百千萬億佛土中。諸佛世尊。多所饒益。安樂衆
生。是諸佛亦以無量無數方便。種種因緣。譬喻言辭。
而爲衆生演說諸法。是法。皆爲一佛乘故。是諸衆生。

從佛聞法。究竟皆得一切種智。舍利弗。是諸佛。但教化菩薩。欲以佛之知見。示衆生故。欲以佛之知見。悟衆生故。欲令衆生入佛之知見故。舍利弗。我今亦復如是。知諸衆生有種種欲。深心所著。隨其本性。以種種因緣。譬喻言辭。方便力。而爲說法。舍利弗。如此。皆爲得一佛乘。一切種智故。

舍利弗。十方世界中。尚無二乘。何況有三。舍利弗。諸佛出於五濁惡世。所謂劫濁。煩惱濁。衆生垢重。慳貪嫉妒。命濁。如是舍利弗。劫濁亂時。衆生垢重。慳貪嫉妒。成就諸不善根故。諸佛以方便力。於一佛乘。分別說三。舍利弗。若我弟子。自謂阿羅漢。辟支佛者。不聞不知諸佛如來。但教化菩薩事。此非佛弟子。非阿羅漢。非辟支佛。又。舍利弗。是諸比丘。比丘尼。自謂已得阿羅漢。是最後身。究竟涅槃。便不復志求阿耨多羅三藐三菩提。當知此輩皆是增上慢人。所以者何。若有

比丘。實得阿羅漢。若不信此法。無有是處。除佛滅度後。現前無佛。所以者何。佛滅度後。如是等經。受持讀誦解義者。是人難得。若遇餘佛。於此法中。便得決了。舍利弗。汝等當一心信解受持佛語。諸佛如來。言無虛妄。無有餘乘。唯一佛乘。

爾時世尊欲重宣此義。而說偈言。
比丘比丘尼。有懷增上慢。優婆塞我慢。優婆夷不信。如是四衆等。其數有五千。不自見其過。於戒有缺漏。護惜其瑕疵。是小智已出。衆中之糟糠。佛威德故去。斯人尠福德。不堪受是法。此衆無枝葉。唯有諸貞實。舍利弗善聽。諸佛所得法。無量方便力。而爲衆生說。衆生心所念。種種所行道。若干諸欲性。先世善惡業。佛悉知是已。以諸緣譬喻。言辭方便力。令一切歡喜。或說修多羅。伽陀及本事。本生未曾有。亦說於因緣。譬喻并祇夜。優波提舍經。鈍根樂小法。貪著於生死。

於諸無量佛。不行深妙道。衆苦所惱亂。爲是說涅槃。我設是方便。令得入佛慧。未曾說汝等。當得成佛道。所以未曾說。說時未至故。今正是其時。決定說大乘。我此九部法。隨順衆生說。入大乘爲本。以故說是經。有佛子心淨。柔輒亦利根。無量諸佛所。而行深妙道。爲此諸佛子。說是大乘經。我記如是人。來世成佛道。以深心念佛。修持淨戒故。此等聞得佛。大喜充徧身。佛知彼心行。故爲說大乘。聲聞若菩薩。聞我所說法。乃至於一偈。皆成佛無疑。十方佛土中。唯有一乘法。無二亦無三。除佛方便說。但以假名字。引導於衆生。說佛智慧故。諸佛出於世。唯此一事實。餘二則非真。終不以小乘。濟度於衆生。佛自住大乘。如其所得法。定慧力莊嚴。以此度衆生。自證無上道。大乘平等法。若以小乘法。乃至於一人。我則墮慳貪。此事爲不可。若人信歸佛。如來不欺誑。亦無貪嫉意。斷諸法中惡。故佛於十方。而獨無所畏。我以相嚴身。光明照世間。

無量衆所尊。爲說實相印。舍利弗當知。我本立誓願。
欲令一切衆。如我等無異。如我昔所願。今者已滿足。
化一切衆生。皆令入佛道。若我遇衆生。盡教以佛道。
無智者錯亂。迷惑不受教。我知此衆生。未曾修善本。
堅著於五欲。癡愛故生惱。以諸欲因緣。墜墮三惡道。
輪迴六趣中。備受諸苦毒。受胎之微形。世世常增長。
薄德少福人。衆苦所逼迫。入邪見稠林。若有若無等。
依止此諸見。具足六十二。深著虛妄法。堅受不可捨。
我慢自矜高。諂曲心不實。於千萬億劫。不聞佛名字。
亦不聞正法。如是人難度。是故舍利弗。我爲設方便。
說諸盡苦道。示之以涅槃。我雖說涅槃。是亦非真滅。
諸法從本來。常自寂滅相。佛子行道已。來世得作佛。
我有方便力。開示三乘法。一切諸世尊。皆說一乘道。
今此諸大衆。皆應除疑惑。諸佛語無異。唯一無二乘。
過去無數劫。無量滅度佛。百千萬億種。其數不可量。
如是諸世尊。種種緣譬喻。無數方便力。演說諸法相。

是諸世尊等。皆說一乘法。化無量衆生。令入於佛道。
又諸大聖主。知一切世間。天人羣生類。深心之所欲。
更以異方便。助顯第一義。若有衆生類。值諸過去佛。
若聞法布施。或持戒忍辱。精進禪智等。種種修福慧。
如是諸人等。皆已成佛道。諸佛滅度後。若人善輒心。
如是諸衆生。皆已成佛道。諸佛滅度已。供養舍利者。
起萬億種塔。金銀及玻瓈。碑磔與瑪瑙。玫瑰琉璃珠。
清淨廣嚴飾。莊校於諸塔。或有起石廟。栴檀及沈水。
木栴並餘材。甑瓦泥土等。若於曠野中。積土成佛廟。
乃至童子戲。聚沙爲佛塔。如是諸人等。皆已成佛道。
若人爲佛故。建立諸形像。刻雕成衆相。皆已成佛道。
或以七寶成。鍮鈳赤白銅。白鐵及鉛錫。鐵木及與泥。
或以膠漆布。嚴飾作佛像。如是諸人等。皆已成佛道。
彩畫作佛像。百福莊嚴相。自作若使人。皆已成佛道。
乃至童子戲。若草木及筆。或以指爪甲。而畫作佛像。
如是諸人等。漸漸積功德。具足大悲心。皆已成佛道。

但化諸菩薩。度脫無量衆。若人於塔廟。寶像及畫像。以華香幡蓋。敬心而供養。若使人作樂。擊鼓吹角貝。簫笛琴箏篪。琵琶鏡銅鈸。如是衆妙音。盡持以供養。或以歡喜心。歌唄頌佛德。乃至一小音。皆已成佛道。若人散亂心。乃至以一華。供養於畫像。漸見無數佛。或有人禮拜。或復但合掌。乃至舉一手。或復小低頭。以此供養像。漸見無量佛。自成無上道。廣度無數衆。入無餘涅槃。如薪盡火滅。若人散亂心。入於塔廟中。一稱南無佛。皆已成佛道。於諸過去佛。在世或滅後。若有聞是法。皆已成佛道。未來諸世尊。其數無有量。是諸如來等。亦方便說法。一切諸如來。以無量方便。度脫諸衆生。入佛無漏智。若有聞法者。無一不成佛。諸佛本誓願。我所行佛道。普欲令衆生。亦同得此道。未來世諸佛。雖說百千億。無數諸法門。其實爲一乘。諸佛兩足尊。知法常無性。佛種從緣起。是故說一乘。是法住法位。世間相常住。於道場知己。導師方便說。

天人所供養。現在十方佛。其數如恆沙。出現於世間。
安隱衆生故。亦說如是法。知第一寂滅。以方便力故。
雖示種種道。其實爲佛乘。知衆生諸行。深心之所念。
過去所習業。欲性精進力。及諸根利鈍。以種種因緣。
譬喻亦言辭。隨應方便說。今我亦如是。安隱衆生故。
以種種法門。宣示於佛道。我以智慧力。知衆生性欲。
方便說諸法。皆令得歡喜。舍利弗當知。我以佛眼觀。
見六道衆生。貧窮無福慧。入生死險道。相續苦不斷。
深著於五欲。如犛牛愛尾。以貪愛自弊。盲暝無所見。
不求大勢佛。及與斷苦法。深入諸邪見。以苦欲捨苦。
爲是衆生故。而起大悲心。我始坐道場。觀樹亦經行。
於三七日中。思惟如是事。我所得智慧。微妙最第一。
衆生諸根鈍。著樂癡所盲。如斯之等類。云何而可度。
爾時諸梵王。及諸天帝釋。護世四天王。及大自在天。
并餘諸天衆。眷屬百千萬。恭敬合掌禮。請我轉法輪。
我卽自思惟。若但讚佛乘。衆生沒在苦。不能信是法。

破法不信故。墜於三惡道。我寧不說法。疾入於涅槃。
尋念過去佛。所行方便力。我今所得道。亦應說三乘。
作是思惟時。十方佛皆現。梵音慰喻我。善哉釋迦文。
第一之導師。得是無上法。隨諸一切佛。而用方便力。
我等亦皆得。最妙第一法。爲諸衆生類。分別說三乘。
少智樂小法。不自信作佛。是故以方便。分別說諸果。
雖復說三乘。但爲教菩薩。舍利弗當知。我聞聖師子。
深淨微妙音。稱南無諸佛。復作如是念。我出濁惡世。
如諸佛所說。我亦隨順行。思惟是事已。卽趣波羅奈。
諸法寂滅相。不可以言宣。以方便力故。爲五比丘說。
是名轉法輪。便有涅槃音。及以阿羅漢。法僧差別名。
從久遠劫來。讚示涅槃法。生死苦永盡。我常如是說。
舍利弗當知。我見佛子等。志求佛道者。無量千萬億。
咸以恭敬心。皆來至佛所。曾從諸佛聞。方便所說法。
我卽作是念。如來所以出。爲說佛慧故。今正是其時。
舍利弗當知。鈍根小智人。著相憍慢者。不能信是法。

今我喜無畏。於諸菩薩中。正直捨方便。但說無上道。
菩薩聞是法。疑網皆已除。千二百羅漢。悉亦當作佛。
如三世諸佛。說法之儀式。我今亦如是。說無分別法。
諸佛興出世。懸遠值遇難。正使出於世。說是法復難。
無量無數劫。聞是法亦難。能聽是法者。斯人亦復難。
譬如優曇花。一切皆愛樂。天人所希有。時時乃一出。
聞法歡喜讚。乃至發一言。則爲已供養。一切三世佛。
是人甚希有。過於優曇華。汝等勿有疑。我爲諸法王。
普告諸大衆。但以一乘道。教化諸菩薩。無聲聞弟子。
汝等舍利弗。聲聞及菩薩。當知是妙法。諸佛之秘要。
以五濁惡世。但樂著諸欲。如是等衆生。終不求佛道。
當來世惡人。聞佛說一乘。迷惑不信受。破法墮惡道。
有慚愧清淨。志求佛道者。當爲如是等。廣讚一乘道。
舍利弗當知。諸佛法如是。以萬億方便。隨宜而說法。
其不習學者。不能曉了此。汝等旣已知。諸佛世之師。
隨宜方便事。無復諸疑惑。心生大歡喜。自知當作佛。

此經以佛法喻為名者。方便施權。十界十為。如權實之。法。九界。不是。二。佛。自。知。是。實。方。便。施。權。十。界。十。為。於。實。之。領。解。權。實。成。佛。無。疑。

妙法蓮華經卷一終 誦補闕真言

世尊現瑞。彌勒疑詳。文殊為眾廣宣揚。古佛放毫光。
三請法王。為演妙香。

南無法華會上菩薩。三稱

持驗記

○晉燉煌郡。釋曇摩羅刹。華言法護。本姓支氏。八歲
出家。誦經日萬言。志弘大道。徧遊西域諸國。賣梵
經還中夏。遂出賢劫正法華諸部。晉武末年。隱居深
山。山有清澗。恆取澡漱。後忽以穢觸而竭。師徘徊
嘆曰。人以涼德。遂使清泉輟流乎。言訖。泉流滿澗。

其幽誠所感如此。時稱燉煌菩薩。

○晉釋鳩摩羅什。華言童壽。天竺人也。七歲出家。日

誦千偈。年十二至沙勒國。說法之暇。專務方等。於

是聲滿葱左。龜茲王迎還國。請開方等經奧。師爲推

辨諸法皆空無我。分別陰界假名非實聽者莫不感悟。

苻秦時太史奏有星見外國分野。當有大智入輔中國。

卽遣使求之。後秦弘始三年十二月。迎師至長安。止

逍遙園。譯妙法蓮華經。義皆圓通。衆心愜伏。續出

小品金剛般若等經。及諸論。凡三百餘卷。師雅好大

乘。志存敷廣。將終。語衆曰。願所宣譯。後世咸共

弘通。今於衆前發誠實誓。若所傳無謬。當侯焚身之

後。舌不焦爛。晉義熙五年卒於長安。依外國法闍維

。薪減形化。惟舌不灰。

○晉釋曇翼。餘杭人。初沙門法志。常誦法華。有雉翔

集座隅。如聽經狀。七年雉殞。志瘞之。夜夢一童子

拜曰。因聽經得脫羽類。今生山前王氏定矣。王氏一

○ 日設齋志乃踵門。兒曰。我和上來也。志撫之曰。此我雉兒也。解衣視腋下。果有雉毛三莖。因名以翼。七歲出家。十六薙髮。初入廬山依遠公。繼往關中師羅什。義熙十三年。東還會稽。入秦望山。結茆庵。稱法華精舍。專誦法華。越十二年。有女子披綵服。攜籠盛一白豕。大蒜兩莖。至師前曰。妄入山采薇。日夕矣。豺狼縱橫。歸無生理。敢託一宿。師卻之甚力。女哀鳴不已。遂令居草牀上。夜半號呼腹疼。求師按摩。師以布裹錫杖。遙爲按之。翌日女以綵服化祥雲。豕變白象。蒜化雙蓮。凌空而上。謂師曰。我普賢菩薩也。以汝不久當歸我衆。特來相試。觀汝心真。如水中月。不可染污也。旣而爲雨華。地皆震動。太守孟顛。方晨起視事。忽見南方祥雲，光射庭際。知普賢示化。遂以聞於朝。敕建法華寺。卽今天衣寺也。師旣化。漆其身留山中。敕建法華寺。卽今天衣寺。宋釋道生。鉅鹿人。幼從竺法汰出家。初入廬山。幽

棲七年。時誦法華經。嘗以入道之要。慧解爲本。於
吟鑽仰羣經。不憚疲苦。往關中稟承羅什。辨問超卓
。凋稱神悟。後入虎邱山講經。至闡提皆有佛性。頑
石皆爲點頭。又在半塘誦法華經。有一童子。從師出
家。亦誦法華。無何童子命終。因瘞於林。一夕聞誦
經聲。鄉人異之。啓視乃獲一舌。生青蓮華。因是起塔
。反葺成寺。〔卽今半塘寺〕高啓爲詠詩云。黃土但
埋骨。豈能埋性靈。昔聞宿草間。曾吐蓮華青。身歸
長夜臺。口誦西方經。尋跡殊宵宵。聞聲海每泠泠。
寒燈照空塔。時有山僧聽。應使鄰塚聞。沈迷盡皆醒。

妙法蓮華經卷第二

受故此品更請佛為譬說。
前顯一作三上乘一獲悟。廣明五成佛開。

後秦三藏法師鳩摩羅什奉詔譯

妙法蓮華經譬喻品第三

一車譬之喻。說一悟三乘。以譬中。下根抱迷。喻更約三車也。

爾時舍利弗踊躍歡喜。即起。合掌。瞻仰尊顏。而白佛言。今從世尊聞此法音。心懷踊躍。得未曾有。所以者何。我昔從佛聞如是法。見諸菩薩受記作佛。而我等不預斯事。甚自感傷。失於如來無量知見。世尊。我常獨處山林樹下。若坐若行。每作是念。我等同入法性。云何如來以小乘法而見濟度。是我等咎。非世尊也。所以者何。若我等待說所因。成就阿耨多羅三藐三菩提者。必以大乘而得度脫。然我等不解方便隨宜所說。初聞佛

法。遇。便信受。思惟取證。世尊。我從昔來。終日竟夜。每自克責。而今從佛。聞所未聞。未曾有法。斷諸疑悔。身意泰然。快得安隱。今日乃知真是佛子。從佛口生。從法化生。得佛法分。

爾時舍利弗欲重宣此義。而說偈言。
我聞是法音。得所未曾有。心懷大歡喜。疑網皆已除。
昔來蒙佛教。不失於大乘。佛音甚希有。能除衆生惱。
我已得漏盡。聞亦除憂惱。我處於山谷。或在林樹下。
若坐若經行。常思惟是事。嗚呼深自責。云何而自欺。
我等亦佛子。同入無漏法。不能於未來。演說無上道。
金色三十二。十力諸解脫。同共一法中。而不得此事。
八十種妙好。十八不共法。如是等功德。而我皆已失。
我獨經行時。見佛在大衆。名聞滿十方。廣饒益衆生。
自惟失此利。我爲自欺誑。我常於日夜。每思惟是事。
欲以問世尊。爲失爲不失。我常見世尊。稱讚諸菩薩。

以是於日夜。籌量此是事。今聞佛音聲。隨宜而說法。
無漏難思議。令衆至道場。我本著邪見。爲諸梵志師。
世尊知我心。拔邪說涅槃。我悉除邪見。於空法得證。
爾時心自謂。得至於滅度。而今乃自覺。非是實滅度。
若得作佛時。具三十二相。天人夜叉衆。龍神等恭敬。
是時乃可謂。永盡滅無餘。佛於大衆中。說我當作佛。
聞如是法音。疑悔悉已除。初聞佛所說。心中大驚疑。
將非魔作佛。惱亂我心耶。佛以種種緣。譬喻巧言說。
其心安如海。我聞疑網斷。佛說過去世。無量滅度佛。
安住方便中。亦皆說是法。現在未來佛。其數無有量。
亦以諸方便。演說如是法。如今者世尊。從生及出家。
得道轉法輪。亦以方便說。世尊說實道。波旬無此事。
以是我定知。非是魔作佛。我墮疑網故。謂是魔所爲。
聞佛柔輒音。深遠甚微妙。演暢清淨法。我心大歡喜。
疑悔永已盡。安住實智中。我定當作佛。爲天人所敬。
轉無上法輪。教化諸菩薩。

爾時佛告舍利弗。吾今於天。人。沙門。婆羅門。等大衆中說。我昔曾於二萬億佛所。爲無上道故。常教化汝。汝亦長夜隨我受學。我以方便引導汝故。生我法中。舍利弗。我昔教汝志願佛道。汝今悉忘。而便自謂。已得減度。我今還欲令汝憶念本願所行道故。爲諸聲聞。說是大乘經。名妙法蓮華。教菩薩法。佛所護念。舍利弗。汝於未來世。過無量無邊。不可思議劫。供養若干千萬億佛。奉持正法。具足菩薩所行之道。當得作佛。號曰華光如來。應供。正遍知。明行足。善逝。世間解。無上士。調御丈夫。天人師。佛。世尊。國名離垢。其土平正。清淨嚴飾。安隱。豐樂。天人熾盛。琉璃爲地。有八交道。黃金爲繩。以界其側。其傍各有七寶行樹。常有華果。華光如來。亦以三乘教化衆生。

舍利弗。彼佛出時。雖非惡世。以本願故。說三乘法。其劫。名大寶莊嚴。何故名曰大寶莊嚴。其國中。以菩薩爲大寶故。彼諸菩薩。無量無邊。不可思議。算數譬喻所不能及。非佛智力。無能知者。若欲行時。寶華承足。此諸菩薩。非初發意。皆久植德本。於無量百千萬億佛所。淨修梵行。恆爲諸佛之所稱歎。常修佛慧。具大神通。善知一切諸法之門。質直無僞。志念堅固。如是菩薩。充滿其國。

舍利弗。華光佛。壽十二小劫。除爲王子。未作佛時。其國人民。壽八小劫。華光如來。過十二小劫。授堅滿菩薩。阿耨多羅三藐三菩提記。告諸比丘。是堅滿菩薩。次當作佛。號曰華足安行。多陀阿伽度。阿羅訶。三藐三佛陀。其佛國土。亦復如是。舍利弗。是華光佛滅度之後。正法住世。三十二小劫。像法住世。亦三十二小劫。

爾時世尊欲重宣此義。而說偈言。
舍利弗來世。成佛普智尊。號名曰華光。當度無量衆。
供養無數佛。具足菩薩行。十力等功德。證於無上道。
過無量劫已。劫名大寶嚴。世界名離垢。清淨無瑕穢。
以琉璃爲地。金繩界其道。七寶雜色樹。常有華果實。
彼國諸菩薩。志念常堅固。神通波羅蜜。皆已悉具足。
於無數佛所。善學菩薩道。如是等大士。華光佛所化。
佛爲王子時。棄國捨世榮。於最末後身。出家成佛道。
華光佛住世。壽十二小劫。其國人民衆。壽命八小劫。
佛滅度之後。正法住於世。三十二小劫。廣度諸衆生。
正法滅盡已。像法三十二。舍利廣流布。天人普供養。
華光佛所爲。其事皆如是。其兩足聖尊。最勝無倫匹。
彼卽是汝身。宜應自欣慶。

爾時四部衆。比丘。比丘尼。優婆塞。優婆夷。天龍。

夜叉。乾闥婆。阿修羅。迦樓羅。緊那羅。摩睺羅伽。等大衆。見舍利弗於佛前受阿耨多羅三藐三菩提記。心大歡喜。踊躍無量。各各脫身所著上衣。以供養佛。釋提桓因。梵天王。等。與無數天子。亦以天妙衣。天曼陀羅華。摩訶曼陀羅華。等。供養於佛。所散天衣。住虛空中。而自迴轉。諸天伎樂。百千萬種。於虛空中。一時俱作。雨衆天華。而作是言。佛昔於波羅奈。初轉法輪。今乃復轉無上最大法輪。

爾時諸天子欲重宣此義。而說偈言。昔於波羅奈。轉四諦法輪。分別說諸法。五衆之生滅。今復轉最妙。無上大法輪。是法甚深奧。少有能信者。我等從昔來。數聞世尊說。未曾聞如是。深妙之上法。世尊說是法。我等皆隨喜。大智舍利弗。今得受尊記。我等亦如是。必當得作佛。於一切世間。最尊無有上。佛道叵思議。方便隨宜說。我所有福業。今世若過世。

及見佛功德。盡回向佛道。

喜上是舍利弗陳半授為衆

周根人譬說

爾時舍利弗白佛言。世尊。我今無復疑悔。親於佛前。得受阿耨多羅三藐三菩提記。是諸千二百心自在者。昔住學地。佛常教化。言我法。能離生老病死。究竟涅槃。是學無學人。亦各自以離我見及有無見等。謂得涅槃。而今於世尊前。聞所未聞。皆墮疑惑。善哉。世尊。願為四衆說其因緣。令離疑悔。

爾時佛告舍利弗。我先不言。諸佛世尊。以種種因緣。譬喻言辭。方便說法。皆為阿耨多羅三藐三菩提耶。是諸所說。皆為化菩薩故。然舍利弗。今當復以譬喻。更明此義。諸有智者。以譬喻得解。上當復以譬喻。更

二百聲聞。猶墮疑悔。故為更請如來。惑得記。自陳。千。即為中下根人作三車一車譬喻之說也。

舍利弗。若國邑聚落。有大長者。其年衰邁。財富無量。多有田宅。及諸僮僕。其家廣大。唯有一門。多諸人衆。一百。二百。乃至五百人。止住其中。堂閣朽故。牆壁墮落。柱根腐敗。梁棟傾危。周帀俱時。欻然火起。焚燒舍宅。長者諸子。若十。二十。或至三十。在住宅中。長者見是大火從四面起。卽大驚怖。而作是念。我雖能於此所燒之門。安隱得出。而諸子等。於火宅內。樂著嬉戲。不覺不知。不驚不怖。火來逼身。苦痛切己。心不厭患。無求出意。

舍利弗。是長者作是思惟。我身手有力。當以衣裓。若以几案。從舍出之。復更思惟。是舍。唯有一門。而復隘小。諸子幼稚。未有所識。戀著戲處。或當墮落。爲火所燒。我當爲說怖畏之事。此舍已燒。宜時疾出。無令爲火之所燒害。作是念已。如所思惟。具告諸子。汝等速出。父雖憐愍。善言誘喻。而諸子等樂著嬉戲。不

肯信受。不驚不畏。了無出心。亦復不知何者是火。何者爲舍。云何爲失。但東西走戲。視父而已。

爾時長者卽作是念。此舍已爲大火所燒。我及諸子若不時出。必爲所焚。我今當設方便。令諸子等得免斯害。父知諸子。先心各有所好。種種珍玩奇異之物。情必樂著。而告之言。汝等所可玩好。希有難得。汝若不取。後必憂悔。如此種種羊車。鹿車。牛車。今在門外。可以遊戲。汝等於此火宅。宜速出來。隨汝所欲。皆當與汝。爾時諸子聞父所說珍玩之物。適其願故。心各勇銳。互相推排。競共馳走。爭出火宅。是時長者見諸子等安隱得出。皆於四衢道中。露地而坐。無復障礙。其心泰然。歡喜踊躍。時諸子等各白父言。父先所許玩好之具。羊車。鹿車。牛車。願時賜與。

舍利弗。爾時長者各賜諸子。等一大車。其車高廣。衆

寶莊校。周币欄楯。四面懸鈴。又於其上。張設幪蓋。亦以珍奇雜寶而嚴飾之。寶繩交絡。垂諸華纓。重敷婉筵。安置丹枕。駕以白牛。膚色充潔。形體殊好。有大筋力。行步平正。其疾如風。又多僕從。而侍衛之。所以者何。是大長者。財富無量。種種諸藏。悉皆充溢。而作是念。我財物無極。不應以下劣小車。與諸子等。今此幼童。皆是吾子。愛無偏黨。我有如是七寶大車。其數無量。應當等心。各各與之。不宜差別。所以者何。以我此物。周給一國。猶尚不匱。何況諸子。是時諸子各乘大車。得未曾有。非本所望。

舍利弗。於汝意云何。是長者。等與諸子珍寶大車。寧有虛妄不。舍利弗言。不也。世尊。是長者。但令諸子得免火難。全其軀命。非爲虛妄。何以故。若全身命。便爲已得玩好之具。況復方便。於彼火宅而拔濟之。世尊。若是長者。乃至不與最小一車。猶不虛妄。何以故。

。是長者先作是意。我以方便。令子得出。以是因緣。無虛妄也。何況長者。自知財富無量。欲饒益諸子。等與大車。

佛告舍利弗。善哉善哉。如汝所言。舍利弗。如來亦復如是。則爲一切世間之父。於諸怖畏。衰惱。憂患。無明闇蔽。永盡無餘。而悉成就無量知見。力無所畏。有大神力及智慧力。具足方便。智慧波羅蜜。大慈。大悲。常無懈倦。恆求善事。利益一切。而生三界朽故火宅。爲度衆生。生老病死。憂悲。苦惱。愚癡。闇蔽。三毒之火。教化。令得阿耨多羅三藐三菩提。見諸衆生爲生老病死。憂悲。苦惱。之所燒煮。亦以五欲財利故。受種種苦。又以貪著追求故。現受衆苦。後受地獄。畜生。餓鬼。之苦。若生天上。及在人間。貧窮困苦。愛別離苦。怨憎會苦。如是等種種諸苦。衆生沒在其中。歡喜遊戲。不覺不知。不驚不怖。亦不生厭。不求解脫。

。於此三界火宅。東西馳走。雖遭大苦。不以爲患。舍利弗。佛見此已。便作是念。我爲衆生之父。應拔其苦難。與無量無邊佛智慧樂。令其遊戲。

舍利弗。如來復作是念。若我但以神力。及智慧力。捨於方便。爲諸衆生讚如來知見。力無所畏者。衆生不能以是得度。所以者何。是諸衆生。未免生老病死。憂悲。苦惱。而爲三界火宅所燒。何由能解佛之智慧。舍利弗。如彼長者。雖復身手有力。而不用之。但以慇懃方便。勉濟諸子火宅之難。然後各與珍寶大車。如來亦復如是。雖有力。無所畏。而不用之。但以智慧方便。於三界火宅。拔濟衆生。爲說三乘。聲聞。辟支佛。佛乘。而作是言。汝等莫得樂住三界火宅。勿貪麤弊。色聲香味觸也。若貪著生愛。則爲所燒。汝速出三界。當得三乘。聲聞。辟支佛。佛乘。我今爲汝保任此事。

終不虛也。汝等但當勤修精進。如來以是方便。誘進衆生。復作是言。汝等當知此三乘法。皆是聖所稱歎。自在無繫。無所依求。乘是三乘。以無漏根。力。覺。道。禪定。解脫。三昧。等。而自娛樂。使得無量安隱快樂。

舍利弗。若有衆生。內有智性。從佛世尊聞法信受。慇懃精進。欲速出三界。自求涅槃。是名聲聞乘。如彼諸子爲求羊車。出於火宅。若有衆生。從佛世尊聞法信受。慇懃精進。求自然慧。樂獨善寂。深知諸法因緣。是名辟支佛乘。如彼諸子爲求鹿車。出於火宅。若有衆生。從佛世尊聞法信受。勤修精進。求一切智。佛智。自然智。無師智。如來知見。力無所畏。愍念。安樂無量衆生。利益天人。度脫一切。是名大乘。菩薩求此乘故。名爲摩訶薩。如彼諸子爲求牛車。出於火宅。

舍利弗。如彼長者。見諸子等安隱得出火宅。到無畏處。自惟財富無量。等以大車而賜諸子。如來亦復如是。爲一切衆生之父。若見無量億千衆生。以佛教門。出三界苦。怖畏險道。得涅槃樂。如來爾時便作是念。我無量無邊智慧力。無畏等諸佛法藏。是諸衆生。皆是我子。等與大乘。不令有人獨得減度。皆以如來減度而滅度之。是諸衆生脫三界者。悉與諸佛禪定。解脫。等娛樂之具。皆是一相。一種。聖所稱歎。能生淨妙第一之樂。

舍利弗。如彼長者。初以三車誘引諸子。然後但與大車。寶物莊嚴。安隱第一。然彼長者無虛妄之咎。如來亦復如是。無有虛妄。初說三乘。引導衆生。然後但以大乘而度脫之。何以故。如來有無量智慧。力。無所畏。諸法之藏。能與一切衆生大乘之法。但不盡能受。舍利弗。以是因緣。當知諸佛方便力故。於一佛乘。分別說。

三。

佛欲重宣此義。而說偈言。
譬如長者。有一大宅。其宅久故。而復頓弊。
堂舍高危。柱根摧朽。梁棟傾斜。基陛墮毀。
牆壁圯坼。泥塗坳落。覆苫亂墜。椽栳差脫。
周障屈曲。雜穢充徧。有五百人。止住其中。
鴟梟雕鷲。烏鵲鳩鴿。蚺蛇蝮蠍。蜈蚣蚰蜒。
守宮百足。鼬狸鼯鼠。諸惡蟲輩。交橫馳走。
屎尿臭處。不淨流溢。蜚蝗諸蟲。而集其上。
狐狼野干。咀嚼踐踏。瘠齧死屍。骨肉狼藉。
由是羣狗。競來搏撮。飢羸悼惶。處處求食。
鬪爭搯掣。唯啾嗥吠。其舍恐怖。變狀如是。
處處皆有。魑魅魍魎。夜叉惡鬼。食噉人肉。
毒蟲之屬。諸惡禽獸。孚乳產生。各自藏護。
夜叉競來。爭取食之。食之既飽。惡心轉熾。

鬪諍之聲。甚可怖畏。鳩槃荼鬼。蹲踞土埵。或時離地。一尺二尺。往返遊行。縱逸嬉戲。捉狗兩足。撲令失聲。以腳加頸。怖狗自樂。復有諸鬼。其身長大。裸形黑瘦。常住其中。發大惡聲。叫呼求食。復有諸鬼。其咽如鍼。復有諸鬼。首如牛頭。或食人肉。或復噉狗。頭髮鬣亂。殘害兇險。飢渴所逼。叫喚馳走。夜叉餓鬼。諸惡鳥獸。飢急四向。窺看窗牖。如是諸難。恐懼無量。是朽故宅。屬於一人。其人近出。未久之間。於後舍宅。忽然火起。四面一時。其燄俱熾。棟梁椽柱。爆聲震裂。摧折墮落。牆壁崩倒。諸鬼神等。揚聲大叫。雕鷲諸鳥。鳩槃荼等。周悼惶怖。不能自出。惡獸毒蟲。藏竄孔穴。毘舍闍鬼。亦住其中。薄福德故。爲火所逼。共相殘害。飲血噉肉。野干之屬。並已前死。諸大惡獸。競來食噉。

臭烟烽焯。四面充塞。蜈蚣蚰蜒。毒蛇之類。
爲火所燒。爭走出穴。鳩槃荼鬼。隨取而食。
又諸餓鬼。頭上火燃。飢渴熱惱。周樟悶走。
其它如是。甚可怖畏。毒害火災。衆難非一。
是時宅主。在門外立。聞有人言。汝諸子等。
先因遊戲。來入此宅。稚小無知。歡娛樂著。
長者聞已。驚入火宅。方宜救濟。令無燒害。
告喻諸子。說衆患難。惡鬼毒蟲。災火蔓延。
衆苦次第。相續不絕。毒蛇虻蝮。及諸夜叉。
鳩槃荼鬼。野干狐狗。鷗鷺鴟梟。百足之屬。
飢渴惱急。甚可怖畏。此苦難處。況復大火。
諸子無知。雖聞父誨。猶故樂著。嬉戲不已。
是時長者。而作是念。諸子如此。益我愁惱。
今此舍宅。無一可樂。而諸子等。耽湎嬉戲。
不受我教。將爲火害。即便思惟。設諸方便。
告諸子等。我有種種。珍玩之具。妙寶好車。

羊車鹿車。大牛之車。今在門外。汝等出來。
吾爲汝等。造作此車。隨意所樂。可以遊戲。
諸子聞說。如此諸車。卽時奔競。馳走而出。
到於空地。離諸苦難。長者見子。得出火宅。
住於四衢。坐師子座。而自慶言。我今快樂。
此諸子等。生育甚難。愚小無知。而入險宅。
多諸毒蟲。魑魅可畏。大火猛燄。四面俱起。
而此諸子。貪著嬉戲。我已救之。令得脫難。
是故諸人。我今快樂。爾時諸子。知父安坐。
皆詣父所。而白父言。願賜我等。三種寶車。
如前所許。諸子出來。當以三車。隨汝所欲。
今正是時。惟垂給與。長者大富。庫藏衆多。
金銀琉璃。碑磔瑪瑙。以衆寶物。造諸大車。
莊校嚴飾。周币欄楯。四面懸鈴。金繩交絡。
眞珠羅網。張施其上。金華諸纓。處處垂下。
衆綵雜飾。周币圍繞。柔輦繒纒。以爲茵褥。

上妙細氎。價值千億。鮮白淨潔。以覆其上。
有大白牛。肥壯多力。形體殊好。以駕寶車。
多諸僮從。而侍衛之。以是妙車。等賜諸子。
諸子是時。歡喜踊躍。乘是寶車。遊於四方。
嬉戲快樂。自在無礙。告舍利弗。我亦如是。
衆聖中尊。世間之父。一切衆生。皆是吾子。
深著世樂。無有慧心。三界無安。猶如火宅。
衆苦充滿。甚可怖畏。常有生老。病死憂患。
如是等火。熾燃不息。如來已離。三界火宅。
寂然閒居。安處林野。今此三界。皆是我有。
其中衆生。悉是吾子。而今此處。多諸患難。
唯我一人。能爲救護。雖復教詔。而不信受。
於諸欲染。貪著深故。以是方便。爲說三乘。
令諸衆生。知三界苦。開示演說。出世間道。
是諸子等。若心決定。具足三明。及六神通。
有得緣覺。不退菩薩。汝舍利弗。我爲衆生。

以此譬喻。說一佛乘。汝等若能。信受是語。
一切皆當。成得佛道。是乘微妙。清淨第一。
於諸世間。爲無有上。佛所悅可。一切衆生。
所應稱讚。供養禮拜。無量億千。諸力解脫。
禪定智慧。及佛餘法。得如是乘。令諸子等。
日夜劫數。常得遊戲。與諸菩薩。及聲聞衆。
乘此寶乘。直至道場。以是因緣。十方諦求。
更無餘乘。除佛方便。告舍利弗。汝諸人等。
皆是吾子。我則是父。汝等累劫。衆苦所燒。
我皆濟拔。令出三界。我雖先說。汝等滅度。
但盡生死。而實不滅。今所應作。唯佛智慧。
若有菩薩。於是衆中。能一心聽。諸佛實法。
諸佛世尊。雖以方便。所化衆生。皆是菩薩。
若人小智。深著愛欲。爲此等故。說於苦諦。
衆生心喜。得未曾有。佛說苦諦。真實無異。
若有衆生。不知苦本。深著苦因。不能暫捨。

爲是等故。方便說道。諸苦所因。貪欲爲本。
若滅貪欲。無所依止。滅盡諸苦。名第三諦。
爲滅諦故。修行於道。離諸苦縛。名得解脫。
是人於何。而得解脫。但離虛妄。名爲解脫。
其實未得。一切解脫。佛說是人。未實滅度。
斯人未得。無上道故。我意不欲。令至滅度。
我爲法王。於法自在。安隱衆生。故現於世。
汝舍利弗。我此法印。爲欲利益。世間故說。
在所遊方。勿妄宣傳。若有聞者。隨喜頂受。
當知是人。阿鞞跋致。若有信受。此經法者。
是人已曾。見過去佛。恭敬供養。亦聞是法。
若人有能。信汝所說。則爲見我。亦見於汝。
及比丘僧。并諸菩薩。斯法華經。爲深智說。
淺識聞之。迷惑不解。一切聲聞。及辟支佛。
於此經中。力所不及。汝舍利弗。尚於此經。
以信得入。況餘聲聞。其餘聲聞。信佛語故。

隨順此經。非己智分。又舍利弗。憍慢懈怠。計我見者。莫說此經。凡夫淺識。深著五欲。聞不能解。亦勿爲說。若人不信。毀謗此經。則斷一切。世間佛種。或復墮蹙。而懷疑惑。汝當聽說。此人罪報。若佛在世。若滅度後。其有誹謗。如斯經典。見有讀誦。書持經者。輕賤憎嫉。而懷結恨。此人罪報。汝今復聽。其人命終。入阿鼻獄。具足一劫。劫盡更生。如是展轉。至無數劫。從地獄出。當墮畜生。若狗野干。其形頹瘦。鰲黠疥癩。人所觸撓。又復爲人。之所惡賤。常困飢渴。骨肉枯竭。生受楚毒。死被瓦石。斷佛種故。受斯罪報。若作駝。或生驢中。身常負重。加諸杖捶。但念水草。餘無所知。謗斯經故。獲罪如是。有作野干。來入聚落。身體疥癩。又無一目。爲諸童子。之所打擲。受諸苦痛。或時致死。

於此死已。更受蟒身。其形長大。五百由旬。
聾駿無足。宛轉腹行。爲諸小蟲之所呷食。
晝夜受苦。無有休息。謗斯經故。獲罪如是。
若得爲人。諸根闇鈍。矬陋攣蹙。盲聾背偃。
有所言說。人不信受。口氣常臭。鬼魅所著。
貧窮下賤。爲人所使。多病瘠瘦。無所依怙。
雖親附人。人不在意。若有所得。尋復忘失。
若修醫道。順方治病。更增他疾。或復致死。
若自有病。無人救療。設服良藥。而復增劇。
若他反逆。抄劫竊盜。如是等罪。橫罹其殃。
如斯罪人。永不見佛。衆聖之王。說法教化。
如斯罪人。常生難處。狂聾心亂。永不聞法。
於無數劫。如恆河沙。生輒聾瘖。諸根不具。
常處地獄。如遊園觀。在餘惡道。如已舍宅。
駝驢豬狗。是其行處。謗斯經故。獲罪如是。
若得爲人。聾盲瘖瘂。貧窮諸衰。以自莊嚴。

水腫乾癆。疥癩癰疽。如是等病。以爲衣服。
身常臭處。垢穢不淨。深著我見。增益瞋恚。
淫欲熾盛。不擇禽獸。謗斯經故。獲罪如是。
告舍利弗。謗斯經者。若說其罪。窮劫不盡。
以是因緣。我故語汝。無智人中。莫說此經。
若有利根。智慧明了。多聞強識。求佛道者。
如是之人。乃可爲說。若人曾見。億百千佛。
植諸善本。深心堅固。如是之人。乃可爲說。
若人精進。常修慈心。不惜身命。乃可爲說。
若人恭敬。無有異心。離諸凡愚。獨處山澤。
如是之人。乃可爲說。又舍利弗。若見有人。
捨惡知識。親近善友。如是之人。乃可爲說。
若見佛子。持戒清潔。如淨明珠。求大乘經。
如是之人。乃可爲說。若人無瞋。質直柔軟。
常愍一切。恭敬諸佛。如是之人。乃可爲說。
復有佛子。於大衆中。以清淨心。種種因緣。

譬喻言辭。說法無礙。如是之人。乃可爲說。
若有比丘。爲一切智。四方求法。合掌頂受。
但樂受持。大乘經典。乃至不受。餘經一偈。
如是之人。乃可爲說。如人至心。求佛舍利。
如是求經。得已頂受。其人不復。志求餘經。
亦未曾念。外道典籍。如是之人。乃可爲說。
告舍利弗。我說是相。求佛道者。窮劫不盡。
如是等人。則能信解。汝當爲說。妙法華經。

妙法蓮華經信解品第四

珍。解。悟。不。一。體。外。無。量。

須。宅。提。等。賜。大。聞。佛。所。信。受。三。車。實。

爾時慧命須菩提。摩訶迦旃延。摩訶迦葉。摩訶目犍連。從佛所。聞未曾有法。世尊授舍利弗阿耨多羅三藐三菩提記。發希有心。歡喜踊躍。即從座起。整衣服。偏袒右肩。右膝著地。一心合掌。曲躬恭敬。瞻仰尊顏。而白佛言。我等居僧之首。年並朽邁。自謂已得涅槃。無所堪任。不復進求阿耨多羅三藐三菩提。世尊往昔說法既久。我時在座。身體疲懈。但念空。無相。無作。於菩薩法。遊戲神通。淨佛國土。成就衆生。心不喜樂。所以者何。世尊令我等出於三界。得涅槃證。又今我等年已朽邁。於佛教化菩薩阿耨多羅三藐三菩提。不生一念好樂之心。我等今於佛前。聞授聲聞阿耨多羅三藐三菩提記。心甚歡喜。得未曾有。不謂於今。忽然得聞希有之法。深自慶倖。獲大善利。無量珍寶。不求自得。

世尊。我等今者樂說譬喻。以明斯義。譬若有人。年既幼稚。捨父逃逝。久住他國。或十。二十。至五十歲。年既長大。加復窮困。馳騁四方。以求衣食。漸漸遊行。遇向本國。其父先來。求子不得。中止一城。其家大富。財寶無量。金。銀。琉璃。珊瑚。琥珀。玻璃。珠。等。其諸倉庫。悉皆盈溢。多有僮僕。臣佐。吏民。象馬。車乘。牛羊。無數。出入息利。乃徧他國。商估賈客。亦甚衆多。時貧窮子。遊諸聚落。經歷國邑。遂到其父所止之城。父每念子。與子離別五十餘年。而未曾向人說如此事。但自思惟。心懷悔恨。自念老朽。多有財物。金銀。珍寶。倉庫盈溢。無有子息。一旦終沒。財物散失。無所委付。是以慙慙。每憶其子。復作是念。我若得子。委付財物。坦然快樂。無復憂慮。

世尊。爾時窮子。傭賃展轉。遇到父舍。住立門側。遙見其父。踞師子床。寶几承足。諸婆羅門。刹利。居士。皆恭敬圍繞。以真珠瓔珞。價值千萬。莊嚴其身。吏民。僮僕。手執白拂。侍立左右。覆以寶帳。垂諸華旛。香水灑地。散衆名華。羅列寶物。出內取與。有如是等種種嚴飾。威德特尊。窮子見父有大力勢。卽懷恐怖。悔來至此。竊作是念。此或是王。或是王等。非我傭力得物之處。不如往至貧里。肆力有地。衣食易得。若久住此。或見逼迫。強使我作。作是念已。疾走而去。時富長者於師子座。見子便識。心大歡喜。卽作是念。我財物庫藏。今有所付。我常思念此子。無由見之。而忽自來。甚適我願。我雖年朽。猶故貪惜。卽遣傍人。急追將還。爾時使者。疾走往捉。窮子驚愕。稱怨。大喚。我不相犯。何爲見捉。使者執之愈急。強牽將還。於時窮子。自念無罪。而被囚執。此必定死。轉更惶怖。

。悶絕躄地。父遙見之。而語使言。不須此人。勿強將來。以冷水灑面。令得醒悟。莫復與語。所以者何。父知其子。志意下劣。自知豪貴。爲子所難。審知是子。而以方便。不語他人。云是我子。使者語之。我今放汝。隨意所趣。窮子歡喜。得未曾有。從地而起。往至貧里。以求衣食。

爾時長者將欲誘引其子。而設方便。密遣二人。形色憔悴。無威德者。汝可詣彼。徐語窮子。此有作處。倍與汝值。窮子若許。將來使作。若言欲何所作。便可語之。雇汝除糞。我等二人。亦共汝作。時二使人卽求窮子。旣已得之。具陳上事。爾時窮子先取其價。尋與除糞。其父見子。愍而怪之。又以他日。於窗牖中。遙見子身。羸瘦憔悴。糞土塵坌。污穢不淨。卽脫瓔珞。細軟上服。嚴飾之具。更著麤弊垢膩之衣。塵土坌身。右手執持除糞之器。狀有所畏。語諸作人。汝等勤作。

勿得懈怠。以方便故。得近其子。後復告言。咄。男子。
。汝常此作。勿復餘去。當加汝價。諸有所須。盆器米。
麵。鹽醋之屬。莫自疑難。亦有老弊使人。須者相給。
好自安意。我如汝父。勿復憂慮。所以者何。我年老大。
。而汝少壯。汝常作時。無有欺怠。瞋恨怨言。都不見。
汝有此諸惡。如餘作人。自今已後。如所生子。即時長。
者。更與作字。名之爲兒。爾時窮子。雖欣此遇。猶故。
自謂。客作賤人。由是之故。於二十年中。常令除糞。
過是已後。心相體信。入出無難。然其所止。猶在本處。
。世尊。爾時長者有疾。自知將死不久。語窮子言。我今。
多有金銀珍寶。倉庫盈溢。其中多少。所應取與。汝悉。
知之。我心如是。當體此意。所以者何。今我與汝。便。
爲不異。宜加用心。無令漏失。爾時窮子。卽受教敕。
領知衆物。金銀珍寶。及諸庫藏。而無希取一滄之意。

然其所止。故在本處。下劣之心。亦未能捨。復經少時。父知子意。漸已通泰。成就大志。自鄙先心。臨欲終時。而命其子。并會親。族。國王。大臣。刹利。居士。皆悉已集。卽自宣言。諸君當知。此是我子。我之所生。於某城中。捨我逃走。矜憊辛苦。五十餘年。其本字某。我名某甲。昔在本城。懷憂推覓。忽於此間。遇會得之。此實我子。我實其父。今我所有一切財物。皆是子有。先所出內。是子所知。世尊。是時窮子聞父此言。卽大歡喜。得未曾有。而作是念。我本無心。有所希求。今此寶藏自然而至。

世尊。大富長者。則是如來。我等皆似佛子。如來常說。我等爲子。世尊。我等以三苦故。於生死中。受諸熱惱。迷惑無知。樂著小法。今日世尊。令我等思惟蠲除諸法戲論之糞。我等於中勤加精進。得至涅槃。一日之價。既得此已。心大歡喜。自以爲足。便自謂言。於佛法

中。勤精進故。所得弘多。然世尊先知我等心著弊欲。樂於小法。便見縱捨。不爲分別。汝等當有如來知見寶藏之分。世尊以方便力。說如來智慧。我等從佛。得涅槃一日之價。以爲大得。於此大乘。無有志求。我等又因如來智慧。爲諸菩薩。開示演說。而自於此無有志願。所以者何。佛知我等心樂小法。以方便力。隨我等說。而我等不知真是佛子。今我等方知世尊於佛智慧。無所吝惜。所以者何。我等昔來真是佛子。而但樂小法。若我等有樂大之心。佛則爲我說大乘法。今此經中。唯說一乘。而昔於菩薩前。毀訾聲聞樂小法者。然佛實以大乘教化。是故我等說。本無心有所希求。今法王大寶自然而至。如佛子所應得者。皆已得之。

爾時摩訶迦葉欲重宣此義。而說偈言。
我等今日。聞佛音教。歡喜踊躍。得未曾有。
佛說聲聞。當得作佛。無上寶聚。不求自得。

譬如童子。幼稚無識。捨父逃逝。遠到他土。周流諸國。五十餘年。其父憂念。四方推求。求之既疲。頓止一城。造立舍宅。五欲自娛。其家巨富。多諸金銀。碑磔瑪瑙。真珠琉璃。象馬牛羊。輦輿車乘。田業僮僕。人民衆多。出入息利。乃徧他國。商估賈人。無處不有。千萬億衆。圍繞恭敬。常爲王者。之所愛念。羣臣豪族。皆共宗重。以諸緣故。往來者衆。豪富如是。有大力勢。而年朽邁。益憂念子。夙夜惟念。死時將至。癡子捨我。五十餘年。庫藏諸物。當如之何。爾時窮子。求索衣食。從邑至邑。從國至國。或有所得。或無所得。飢餓羸瘦。體生瘡癬。漸次經歷。到父住城。傭賃展轉。遂至父舍。爾時長者。於其門內。施大寶帳。處師子座。眷屬圍繞。諸人侍衛。或有計算。金銀寶物。出內財產。注記券疏。

窮子見父。豪貴尊嚴。謂是國王。若是王等。
驚怖自怪。何故至此。覆自念言。我若久住。
或見逼迫。強驅使作。思惟是已。馳走而去。
借問貧里。欲往傭作。長者是時。在師子座。
遙見其子。默而識之。卽敕使者。追捉將來。
窮子驚喚。迷悶蹙地。是人執我。必當見殺。
何用衣食。使我至此。長者知子。愚癡狹劣。
不信我言。不信是父。卽以方便。更遣餘人。
眇目矧陋。無威德者。汝可語之。云當相雇。
除諸糞穢。倍與汝價。窮子聞之。歡喜隨來。
爲除糞穢。淨諸房舍。長者於牖。常見其子。
念子愚劣。樂爲鄙事。於是長者。著弊垢衣。
執除糞器。往到子所。方便附近。語令勤作。
旣益汝價。并塗足油。飲食充足。薦席厚暖。
如是苦言。汝當勤作。又以輒語。若如我子。
長者有智。漸令入出。經二十年。執作家事。

示其金銀。眞珠玻瓈。諸物出入。皆使令知。
猶處門外。止宿草庵。自念貧事。我無此物。
父知子心。漸已廣大。欲與財物。卽聚親族。
國王大臣。刹利居士。於此大衆。說是我子。
捨我他行。經五十歲。自見子來。已二十年。
昔於某城。而失是子。周行求索。遂來至此。
凡我所有。舍宅人民。悉以付之。恣其所用。
子念昔貧。志意下劣。今於父所。大獲珍寶。
并及舍宅。一切財物。甚大歡喜。得未曾有。
佛亦如是。知我樂小。未曾說言。汝等作佛。
而說我等。得諸無漏。成就小乘。聲聞弟子。
佛敕我等。說最上道。修習此者。當得成佛。
我承佛教。爲大菩薩。以諸因緣。種種譬喻。
若干言辭。說無上道。諸佛子等。從我聞法。
日夜思惟。精勤修習。是時諸佛。卽授其記。
汝於來世。當得作佛。一切諸佛。秘藏之法。

但爲菩薩。演其實事。而不爲我。說斯真要。
如彼窮子。得近其父。雖知諸物。心不希取。
我等雖說。佛法寶藏。自無志願。亦復如是。
我等內滅。自謂爲足。唯了此事。更無餘事。
我等若聞。淨佛國土。教化衆生。都無欣樂。
所以者何。一切諸法。皆悉空寂。無生無滅。
無大無小。無漏無爲。如是思惟。不生喜樂。
我等長夜。於佛智慧。無貪無著。無復志願。
而自於法。謂是究竟。我等長夜。修習空法。
得脫三界。苦惱之患。住最後身。有餘涅槃。
佛所教化。得道不虛。則爲已得。報佛之恩。
我等雖爲。諸佛子等。說菩薩法。以求佛道。
而於是法。永無願樂。導師見捨。觀我心故。
初不勸進。說有實利。如富長者。知子志劣。
以方便力。柔伏其心。然後乃付。一切財物。
佛亦如是。現希有事。知樂小者。以方便力。

調伏其心。乃教大智。我等今日。得未曾有。
非先所望。而今自得。如彼窮子。得無量寶。
世尊我今。得道得果。於無漏法。得清淨眼。
我等長夜。持佛淨戒。始於今日。得其果報。
法王法中。久修梵行。今得無漏。無上大果。
我等今者。真是聲聞。以佛道聲。令一切聞。
我等今者。真阿羅漢。於諸世間。天人魔梵。
普於其中。應受供養。世尊大恩。以希有事。
憐愍教化。利益我等。無量億劫。誰能報者。
手足供給。頭頂禮敬。一切供養。皆不能報。
若以頂戴。兩肩荷負。於恆沙劫。盡心恭敬。
又以美膳。無量寶衣。及諸臥具。種種湯藥。
牛頭栴檀。及諸珍寶。以起塔廟。寶衣布地。
如斯等事。以用供養。於恆沙劫。亦不能報。
諸佛希有。無量無邊。不可思議。大神通力。
無漏無爲。諸法之王。能爲下劣。忍於斯事。

取相凡夫。隨宜爲說。諸佛於法。得最自在。知諸衆生。種種欲樂。及其志力。隨所堪任。以無量喻。而爲說法。隨諸衆生。宿世善根。又知成熟。未成熟者。種種籌量。分別知己。於一乘道。隨宜說三。四弟子。領解成。假使。千。畢。竟。無。能。報。佛。恩。生。

妙法蓮華經卷第二終

如來喻說。三界爲家。火宅門外布三車。諸子競紛華。長者欣誇。授記果無差。

南無法華會上菩薩。三稱

持驗記

○宋釋璽遇通。梵行精修。長誦法華經陀羅尼啊品。久

而靈異。時楊橋村有趙姓妻。爲魅所憑。請師誦陀羅尼品。有神現形。呼其鬼受責。趙妻得差。後病再發。師往。見所責鬼在前。師曰。前已誠治。那得再來。吾當誦呪。令汝頭作七公。如阿梨樹枝。鬼叩頭哀乞去。病遂愈。

○齊竟陵文宣王。蕭子良。字雲英。敦義愛古。博覽經籍。世稱筆海。與文惠太子。並精佛理。每招致名僧。講諸經乘。尊法之盛。江左未有。或親爲衆僧。賦食行水。誦法華經。冥感雅梵。有類陳思。著淨住子二十卷行世。淨住者。卽梵語布薩。謂淨身口意。如戒而住也。

○梁釋法雲。陽羨周氏。七歲出家。儁朗卓絕。誦妙法華。研精累思。年三十。於妙音寺開講法華淨名。機辨風生。學者輻輳。又嘗於光宅寺。講法華經。忽感天華滿空。下如飛雪。時誌公道超方外。每來雲所。輒停信宿。稱爲大林法師。嘗言吾欲解獅子吼。師卽

陞座剖析。誌彈指讚曰。善哉微妙矣。儀同袁昂家。有嘗供養僧。發願欲如師慧解。夜忽夢一僧云。雲法師燈明佛時。已講此經。那得卒及。

○梁雲光法師。未詳姓氏。普通二年。詔於內殿講法華經。天雨寶華。天監中。帝以亢陽。問誌公。公曰。雲能致雨。帝因請講法華。至其澤普洽。雨卽大霑。高下霑足。

○梁吳興尼道蹟。號總持。得法於菩提達摩。遁居湖州弁嶺峯。晝夜誦法華經。誦滿萬部。不出山者。凡二十年。復歸寂。塔全身於結廬之所。大同元年。塔內忽有青蓮一朵。道俗異之。啓視。見華從舌根生。州郡錄奏。敕建法華寺。

○梁普通二年。高郵有華手尼者。志節冰霜妙法。并華經。不捨晝夜。後每誦一卷。右手爪上。輒生一華。狀如綾絲。五指指皆徧。誦徹六七卷。掌上併生二華。狀如武帝召見。大爲嘉敬。時因號華手尼。

○陳南嶽尊者慧思。武津李氏子。幼持戒。頂禮法華。至忘寢息。因久雨蒸溼。身患浮腫。忍心向經。尋卽痊癒。夢普賢乘白象王。親爲摩頂。頂上隱起肉髻。年十五出家受具。日惟一食。專誦法華。計盈千遍。感瓶水不竭。天童侍奉。時慧文禪師。因閱大論至四諦品偈云。因緣所生法。我說卽是空。亦名爲假名。亦名中道義。恍然大悟。遂遙禮龍樹爲師。依論立觀。師乃往受法。晝夜攝心。脅不至席。坐夏三七日。得宿命通。倍加勇猛。禪障忽起。四肢媛弱。身不隨心。卽自念曰。病從業生。業繇心起。心緣不起。外境何狀。病業與心。都如雲影。如是觀已。顛倒想滅。輕安如故。竟歲猶無所得。深懷內媿。將放身倚壁。豁然大悟法華三昧。自後未聞經。不疑自解。次光州大蘇山。講大般若經。嘗得覲施。於齊光寺。造金字大品般若。金字法華二部。復自述願文一篇。願彌勒佛時。身及此經。一時出現。廣化一切云云。

○陳釋玄光。新羅國人。專修梵行。越滄溟。求中土禪法。於是往衡山參思大禪師。授以四安樂行。俄證法華三昧。返江南。附海舶至大洋。忽覩彩雲雅樂。旌節繽紛而至。空中傳呼云。天帝召玄光師。於龍宮說親證法門。師拱手避讓。見青衣前導。尋入宮城。不類人間官府。左右無非鱗介。戍雜鬼神。既登高臺。談說妙法。七日。然後王躬送別。師復登舟。舟子謂經半日而已。南嶽祖構影室。內圖師像。天台國清寺亦然。

○陳徐孝克。東海剡人。少談玄理。長通五經。梁太清初。起家爲太學博士。性至孝。父憂殆不勝喪。事所生母盡道。天嘉中除剡令。尋復去職。太建中徵爲祕書丞。不就。蔬食長齋。持菩薩戒。晝夜講法華經。六年。除國子祭酒。臨終正坐念佛。室內有非常香氣。鄰里皆驚異之。

○北魏釋志湛。齊州人。住泰山北邃谷中銜草寺。省事。

寡言。人鳥不亂。讀誦法華。人不測其素業。將終時。神僧誌公謂梁武曰。北方銜草寺。須陀洹果聖僧。今日滅度。師果於是日無疾而化。兩手各舒一指。有梵僧云。斯初果也。還葬此山。後發視之。惟舌不壞。建塔表信。

○北魏盧景裕。節閔初。爲國子博士。坐累繫晉陽嶽。至心誦法華普門品。餘力亦誦全經。俄而枷鎖自脫。主者以聞於朝。特見原宥。

妙法蓮華經卷第三

姚秦三藏法師鳩摩羅什奉詔譯

妙法蓮華經藥草喻品第五

破惑真。至於
於惶槃也。

藥草者。能修病延年。喻
聲緣菩薩。能修病延年。喻

爾時世尊告摩訶迦葉。及諸大弟子。善哉。善哉。迦葉。善說如來真實功德。誠如所言。如來復有無量無邊阿僧祇功德。汝等若於無量億劫。說不能盡。迦葉。當知如來是諸法之王。若有所說。皆不虛也。於一切法。以智方便而演說之。其所說法。皆悉到於一切智地。如來觀知一切諸法之所歸趣。亦知一切衆生深心所行。通達無礙。又於諸法。究盡明了。示諸衆生一切智慧。迦葉。譬如三千大千世界。山川谿谷土地。所生卉木叢林。及諸藥草。種類若干。名色各異。密雲彌布。徧覆三千大

千世界。一時等澍。其澤普洽。卉木叢林。及諸藥草。小根小莖。小枝小葉。中根中莖。中枝中葉。大根大莖。大枝大葉。諸樹大小。隨上中下。各有所受。一雲所雨。稱其種性而得生長。華果敷實。雖一地所生。一雨所潤。而諸草木。各有差別。

迦葉。當知如來亦復如是。出現於世。如大雲起。以大音聲。普徧世界天人。阿修羅。如彼大雲徧覆三千大千國土。於大眾中。而唱是言。我是如來。應供。正徧知。明行足。善逝。世間解。無上士。調御丈夫。天人師。佛。世尊。未度者令度。未解者令解。未安者令安。未涅槃者令得涅槃。今世後世。如實知之。我是一切知者。一切見者。知道者。開道者。說道者。汝等天人。阿修羅衆。皆應到此。爲聽法故。

爾時無數千萬億種衆生。來至佛所。而聽法。如來於時

。觀是衆生諸根利鈍。精進。懈怠。隨其所堪。而爲說法。種種無量。皆令歡喜。快得善利。是諸衆生。聞是法已。現世安隱。後生善處。以道受樂。亦得聞法。既聞法已。離諸障礙。於諸法中。任力所能。漸得入道。如彼大雲。雨於一切卉木叢林。及諸藥草。如其種性。具足蒙潤。各得生長。

如來說法。一相一味。所謂解脫相。離相。滅相。究竟至於一切種智。其有衆生。聞如來法。若持讀誦。如說修行。所得功德。不自覺知。所以者何。唯有如來。知此衆生種相體性。念何事。思何事。修何事。云何念。云何思。云何修。以何法念。以何法思。以何法修。以何法得何法。衆生住於種種之地。唯有如來。如實見之。明了無礙。如彼卉木叢林。諸藥草等。而不自知上下性。如來知是一相一味之法。所謂解脫相。離相。滅相。究竟涅槃。常寂滅相。終歸於空。佛知是已。觀衆

生心欲。而將護之。是故不卽爲說一切種智。汝等迦葉。甚爲希有。能知如來隨宜說法。能信能受。所以者何。諸佛世尊。隨宜說法。難解難知。

爾時世尊欲重宣此義。而說偈言。破有法王。出現世間。隨衆生欲。種種說法。如來尊重。智慧深遠。久默斯要。不務速說。有智若聞。則能信解。無智疑悔。則爲永失。是故迦葉。隨力爲說。以種種緣。令得正見。迦葉當知。譬如大雲。起於世間。徧覆一切。慧雲含潤。電光晃曜。雷聲遠震。令衆悅豫。日光揜蔽。地上清涼。鬖鬖垂布。如可承攬。其雨普等。四方俱下。流澍無量。率土充洽。山川險谷。幽邃所生。卉木藥草。大小諸樹。百穀苗稼。甘蔗葡萄。雨之所潤。無不豐足。乾地普洽。藥木並茂。其雲所出。一味之水。

草木叢林。隨分受潤。一切諸樹。上中下等。稱其大小。各得生長。根莖枝葉。華果光色。一雨所及。皆得鮮澤。如其體相。性分大小。所潤是一。而各滋茂。佛亦如是。出現於世。譬如大雲。普覆一切。既出於世。為諸衆生。分別演說。諸法之實。大聖世尊。於諸天人。一切衆中。而宣是言。我為如來。兩足之尊。出於世間。猶如大雲。充潤一切。枯槁衆生。皆令離苦。得安隱樂。世間之樂。及涅槃樂。諸天人衆。一心善聽。皆應到此。覲無上尊。我為世尊。無能及者。安隱衆生。故現於世。為大衆說。甘露淨法。其法一味。解脫涅槃。以一妙音。演暢斯義。常為大乘。而作因緣。我觀一切。普皆平等。無有彼此。愛憎之心。我無貪著。亦無限礙。恆為一切。平等說法。如為一人。衆多亦然。常演說法。曾無他事。

去來坐立。終不疲厭。充足世間。如雨普潤。
貴賤上下。持戒毀戒。威儀具足。及不具足。
正見邪見。利根鈍根。等雨法雨。而無懈倦。
一切衆生。聞我法者。隨力所受。住於諸地。
或處人天。轉輪聖王。釋梵諸王。是小藥草。
知無漏法。能得涅槃。起六神通。及得三明。
獨處山林。常行禪定。得緣覺證。是中藥草。
求世尊處。我當作佛。行精進定。是上藥草。
又諸佛子。專心佛道。常行慈悲。自知作佛。
決定無疑。是名小樹。安住神通。轉不退輪。
度無量億。百千衆生。如是菩薩。名爲大樹。
佛平等說。如一味雨。隨衆生性。所受不同。
如彼草木。所稟各異。佛以此喻。方便開示。
種種言辭。演說一法。於佛智慧。如海一滴。
我雨法雨。充滿世間。一味之法。隨力修行。
如彼叢林。藥草諸樹。隨其大小。漸增茂好。

諸佛之法。常以一味。令諸世間。普得具足。
漸次修行。皆得道果。聲聞緣覺。處於山林。
住最後身。聞法得果。是名藥草。各得增長。
若諸菩薩。智慧堅固。了達三界。求最上乘。
是名小樹。而得增長。復有住禪。得神通力。
聞諸法空。心大歡喜。放無數光。度諸衆生。
是名大樹。而得增長。如是迦葉。佛所說法。
譬如大雲。以一味雨。潤於人華。各得成實。
迦葉當知。以諸因緣。種種譬喻。開示佛道。
是我方便。諸佛亦然。今爲汝等。說最實事。
諸聲聞衆。皆非減度。汝等所行。是菩薩道。
漸漸修學。悉當成佛。

妙法蓮華經授記品第六

許五百人當
得成佛。

中劫國人得記成。佛即別授。四大總

爾時世尊說是偈已。告諸大眾。唱如是言。我此弟子摩訶迦葉。於未來世。當得奉覲三百萬億諸佛世尊。供養。恭敬。尊重。讚歎。廣宣諸佛無量大法。於最後身。得成爲佛。名曰光明如來。應供。正遍知。明行足。善逝。世間解。無上士。調御丈夫。天人師。佛。世尊。國名光德。劫名大莊嚴。佛壽。十二小劫。正法住世。二十小劫。像法亦住二十小劫。國界嚴飾。無諸穢惡。瓦礫荊棘。便利不淨。其土平正。無有高下。坑坎堆阜。琉璃爲地。寶樹行列。黃金爲繩。以界道側。散諸寶華。周徧清淨。其國菩薩。無量千億。諸聲聞衆。亦復無數。無有魔事。雖有魔及魔民。皆護佛法。爾時世尊欲重宣此義。而說偈言。

告諸比丘。我以佛眼。見是迦葉。於未來世。過無數劫。當得作佛。而於來世。供養奉覲。三百萬億。諸佛世尊。爲佛智慧。淨修梵行。供養最上。二足尊已。修習一切。無上之慧。於最後身。得成爲佛。其土清淨。琉璃爲地。多諸寶樹。行列道側。金繩界道。見者歡喜。常出好香。散衆名華。種種奇妙。以爲莊嚴。其地平正。無有丘坑。諸菩薩衆。不可稱計。其心調柔。速大神通。奉持諸佛。大乘經典。諸聲聞衆。無漏後身。法王之子。亦不可計。乃以天眼。不能數知。其佛當壽。十二小劫。正法住世。二十小劫。像法亦住。二十小劫。光明世尊。其事如是。

爾時大目犍連。須菩提。摩訶迦旃延等。皆悉悚栗。一心合掌。瞻仰世顏。目不暫捨。卽共同聲而說偈言。

大雄猛世尊。諸釋之法王。哀愍我等故。而賜佛音聲。
若知我深心。見爲授記者。如以甘露灑。除熱得清涼。
如從饑國來。忽遇大王膳。心猶懷疑懼。未敢即便食。
若復得王教。然後乃敢食。我等亦如是。每惟小乘過。
不知當云何。得佛無上慧。雖聞佛音聲。言我等作佛。
心尚懷憂懼。如未敢便食。若蒙佛授記。爾乃快安樂。
大雄猛世尊。常欲安世間。願賜我等記。如飢需教食。
爾時世尊知諸大弟子心之所念。告諸比丘。是須菩提。
於當來世。奉覲三百萬億那由他佛供養。恭敬。尊重。
讚歎。常修梵行。具菩薩道。於最後身。得成爲佛。號
曰名相如來。應供。正徧知。明行足。善逝。世間解。
無上士。調御丈夫。天人師。佛。世尊。劫名有寶。國
名寶生。其土平正。玻瓈爲地。寶樹莊嚴。無諸丘坑。
沙礫。荊棘。便利之穢。寶華覆地。周徧清淨。其土人
民。皆處寶臺。珍妙樓閣。聲聞弟子。無量無邊。算數

譬喻所不能知。諸菩薩衆。無數千萬億那由他。佛壽。十二小劫。正法住世。二十小劫。像法亦住二十小劫。其佛常處虛空。爲衆說法。度脫無量菩薩。及聲聞衆。

爾時世尊欲重宣此義。而說偈言。諸比丘衆。今告汝等。皆當一心。聽我所說。我大弟子。須菩提者。當得作佛。號曰名相。當供無數。萬億諸佛。隨佛所行。漸具大道。最後身得。三十二相。端正殊妙。猶如寶山。其佛國土。嚴淨第一。衆生見者。無不愛樂。佛於其中。度無量衆。其佛法中。多諸菩薩。皆悉利根。轉不退輪。彼國常以。菩薩莊嚴。諸聲聞衆。不可稱數。皆得三明。具六神通。住八解脫。有大威德。其佛說法。現於無量。神通變化。不可思議。諸天人民。數如恆沙。皆共合掌。聽受佛語。其佛當壽。十二小劫。

正法住世。二十小劫。像法亦住。二十小劫。

爾時世尊復告諸比丘衆。我今語汝。是大迦旃延。於當
來世。以諸供具。供養奉事八千億佛。恭敬。尊重。諸
佛滅後。各起塔廟。高千由旬。縱廣正等五百由旬。以
金。銀。琉璃。碑磔。瑪瑙。眞珠。玫瑰。七寶合成。
衆華。瓔珞。塗香。末香。燒香。繒蓋。幢幡。供養塔
廟。過是已後。當復供養二萬億佛。亦復如是。供養是
諸佛已。具菩薩道。當得作佛。號曰閻浮那提金光如來
。應供。正遍知。明行足。善逝。世間解。無上士。調
御丈夫。天人師。佛。世尊。其土平正。玻瓈爲地。寶
樹莊嚴。黃金爲繩。以界道側。妙華覆地。周徧清淨。
見者歡喜。無四惡道。地獄。餓鬼。畜生。阿修羅道。
多有天人。諸聲聞衆。及諸菩薩。無量萬億。莊嚴其
國。佛壽。十二小劫。正法住世。二十小劫。像法亦住
二十小劫。

爾時世尊欲重宣此義。而說偈言。
諸比丘衆。皆一心聽。如我所說。真實無異。
是迦梅延。當以種種。妙好供具。供養諸佛。
諸佛滅後。起七寶塔。亦以華香。供養舍利。
其最後身。得佛智慧。成等正覺。國土清淨。
度脫無量。萬億衆生。皆爲十方。之所供養。
佛之光明。無能勝者。其佛號曰。閻浮金光。
菩薩聲聞。斷一切有。無量無數。莊嚴其國。

爾時世尊復告大衆。我今語汝。是大目犍連。當以種種
供具。供養八千諸佛。恭敬。尊重。諸佛滅後。各起塔
廟。高千由旬。縱廣正等五百由旬。皆以金。銀。琉璃
。碑磔。瑪瑙。眞珠。玫瑰。七寶合成。衆華。瓔珞。
塗香。末香。燒香。繒蓋。幢幡。以用供養。過是已後
。當復供養二百萬億諸佛。亦復如是。當得成佛。號曰

多摩羅跋栴檀香如來。應供。正遍知。明行足。善逝。
世間解。無上士。調御丈夫。天人師。佛。世尊。劫名
喜滿。國名意樂。其土平正。玻瓈爲地。寶樹莊嚴。散
眞珠華。周遍清淨。見者歡喜。多諸天人。菩薩。聲
聞。其數無量。佛壽二十四小劫。正法住世。四十小劫
。像法亦住四十小劫。

爾時世尊欲重宣此義。而說偈言。
我此弟子。大目犍連。捨是身已。得見八千。
二百萬億。諸佛世尊。爲佛道故。供養恭敬。
於諸佛所。常修梵行。於無量劫。奉持佛法。
諸佛滅後。起七寶塔。長表金刹。華香伎樂。
而以供養。諸佛塔廟。漸漸具足。菩薩道已。
於意樂國。而得作佛。號多摩羅。栴檀之香。
其佛壽命。二十四劫。常爲天人。演說佛道。
聲聞無量。如恆河沙。三明六通。有大威德。

菩 薩 無 數 。 志 固 精 進 。 於 佛 智 慧 。 皆 不 退 轉 。
 佛 滅 度 後 。 正 法 當 住 。 四 十 小 劫 。 像 法 亦 爾 。
 我 諸 弟 子 。 威 德 具 足 。 其 數 五 百 。 皆 當 授 記 。
 於 未 來 世 。 咸 得 成 佛 。 我 及 汝 等 。 宿 世 因 緣 。
 吾 今 當 說 。 汝 等 善 聽 。

說。一為周竟。人喻。中自下。譬喻。白佛舍利。至此三品。半復文為。

妙法蓮華經化城喻品第七

因智緣。一為周。根說。

為無城。而救喻。有名化涅槃。防禦。非佛禦敵。

佛告諸比丘。乃往過去無量無邊不可思議阿僧祇劫。爾時有佛。名大通智勝如來。應供。正徧知。明行足。善逝。世間解。無上士。調御丈夫。天人師。佛。世尊。其國名好城。劫名大相。諸比丘。彼佛滅度已來。甚大久遠。譬如三千大千世界所有地種。假使有人。磨以為墨。過於東方千國土。乃下一點。大如微塵。又過千國土。復下一點。如是展轉盡地種墨。於汝等意云何。是諸國土。若算師。若算師弟子。能得邊際。知其數不。不也。世尊。諸比丘。是人所經國土。若點不點。盡末為塵。一塵一劫。彼佛滅度已來。復過是數無量無邊百千萬億阿僧祇劫。我以如來知見力故。觀彼久遠。猶若今日。

爾時世尊欲重宣此義。而說偈言。
我念過去世。無量無邊劫。有佛兩足尊。名大通智勝。
如人以力磨。三千大千土。盡此諸地種。皆悉以爲墨。
過於千國土。乃下一塵點。如是展轉點。盡此諸塵墨。
如是諸國土。點與不點等。復盡末爲塵。一塵爲一劫。
此諸微塵數。其劫復過是。彼佛滅度來。如是無量劫。
如來無礙智。知彼佛滅度。及聲聞菩薩。如見今滅度。
諸比丘當知。佛智淨微妙。無漏無所礙。通達無量劫。
佛告諸比丘。大通智勝佛。壽五百四十萬億那由他劫。
其佛本坐道場。破魔軍已。垂得阿耨多羅三藐三菩提。
而諸佛法不現在前。如是一小劫乃至十小劫。結跏趺坐。
。身心不動。而諸佛法猶不在前。
爾時忉利諸天。先爲彼佛。於菩提樹下。敷師子座。高
一由旬。佛於此座。當得阿耨多羅三藐三菩提。適坐此

座時。諸梵天王。雨衆天華。面百由旬。香風時來。吹去萎華。更雨新者。如是不絕。滿十小劫。供養於佛。乃至滅度。常雨此華。四王諸天。爲供養佛。常擊天鼓。其餘諸天。作天伎樂。滿十小劫。至於滅度。亦復如是。諸比丘。大通智勝佛過十小劫。諸佛之法。乃現在前。成阿耨多羅三藐三菩提。其佛未出家時。有十六子。其第一者。名曰智積。諸子各有種種珍異玩好之具。聞父得成阿耨多羅三藐三菩提。皆捨所珍。往詣佛所。諸母涕泣而隨送之。其祖轉輪聖王。與一百大臣。及餘百千萬億人民。皆共圍繞。隨至道場。咸欲親近大通智勝如來。供養恭敬。尊重讚歎。到已。頭面禮足。繞佛畢已。一心合掌。瞻仰世尊。以偈頌曰。

大威德世尊。爲度衆生故。於無量億劫。爾乃得成佛。諸願已具足。善哉吉無上。世尊甚希有。一坐十小劫。身體及手足。寂然安不動。其心常擔怕。未曾有散亂。究竟永寂滅。安住無漏法。今者見世尊。安隱成佛道。

我等得善利。稱慶大歡喜。衆生常苦惱。盲冥無導師。
不識苦盡道。不知求解脫。長夜增惡趣。減損諸天衆。
從冥入於冥。永不聞佛名。今佛得最上。安隱無漏道。
我等及天人。爲得最大利。是故咸稽首。歸命無上尊。
爾時十六王子。偈讚佛已。勸請世尊轉於法輪。咸作是
言。世尊說法。多所安隱。憐愍。饒益。諸天人民。重
說偈言。

世雄無等倫。百福自莊嚴。得無上智慧。願爲世間說。
度脫於我等。及諸衆生類。爲分別顯示。令得是智慧。
若我等得佛。衆生亦復然。世尊知衆生。深心之所念。
亦知所行道。又知智慧力。欲樂及修福。宿命所行業。
世尊悉知己。當轉無上輪。

佛告諸比丘。大通智勝佛。得阿耨多羅三藐三菩提時。

十方各五百萬億諸佛世界。六種震動。其國中間幽冥之處。日月威光所不能照。而皆大明。其中衆生。各得相見。咸作是言。此中云何忽生衆生。又其國界。諸天宮殿。乃至梵宮。六種震動。大光普照。徧滿世界。勝諸天光。爾時東方五百萬億諸國土中。梵天宮殿。光明照耀。倍於常明。諸梵天王。各作是念。今者宮殿光明。昔所未有。以何因緣。而現此相。是時諸梵天王。卽各相詣。共議此事。時彼衆中。有一大梵天王。名救一切。爲諸梵衆而說偈言。我等諸宮殿。光明昔未有。此是何因緣。宜各共求之。爲大德天生。爲佛出世間。而此大光明。徧照於十方。爾時五百萬億國土諸梵天王。與宮殿俱。各以衣祴。盛諸天華。共詣西方。推尋是相。見大通智勝如來。處於道場菩提樹下。坐師子座。諸天。龍王。乾闥婆。緊那羅。摩睺羅伽。人非人。等。恭敬圍繞。及見十六王子。

。請佛轉法輪。卽時諸梵天王頭面禮佛。繞百千帀。卽以天華而散佛上。其所散華。如須彌山。并以供養佛菩提樹。其菩提樹。高十由旬。華供養已。各以宮殿奉上。彼佛。而作是言。唯見哀愍。饒益我等。所獻宮殿。願垂納處。時諸梵天王。卽於佛前。一心同聲。以偈頌曰。

世尊甚稀有。難可得值遇。具無量功德。能救護一切。天人之大師。哀愍於世間。十方諸衆生。普皆蒙饒益。我等所從來。五百萬億國。捨深禪定樂。爲供養佛故。我等先世福。宮殿甚嚴飾。今以奉世尊。唯願哀納受。

爾時諸梵天王。偈讚佛已。各作是言。唯願世尊轉於法輪。度脫衆生。開涅槃道。時諸梵天王。一心同聲。而說偈言。世雄兩足尊。唯願演說法。以大慈悲力。度苦惱衆生。

爾時大通智勝如來。默然許之。又諸比丘。東南方五百萬億國土。諸大梵王。各自見宮殿光明照曜。昔所未有。歡喜踊躍。生希有心。卽各相詣。共議此事。時彼衆中。有一大梵天王。名曰大悲。爲諸梵衆而說偈言。

是事何因緣。而現如此相。我等諸宮殿。光明昔未有。爲大德天生。爲佛出世間。未曾見此相。當共一心求。過千萬億土。尋光共推之。多是佛出世。度脫苦衆生。

爾時五百萬億諸梵天王。與宮殿俱。各以衣祴盛諸天華。共詣西北方。推尋是相。見大通智勝如來。處於道場。菩提樹下。坐師子座。諸天。龍王。乾闥婆。緊那羅。摩睺羅伽。人非人。等。恭敬圍繞。及見十六王子。請佛轉法輪。時諸梵天王頭面禮佛。繞百千帀。卽以天華而散佛上。所散之華。如須彌山。并以供養佛菩提樹。

華供養已。各以宮殿奉上彼佛。而作是言。唯見哀愍。饒益我等。所獻宮殿。願垂納受。

爾時諸梵天王。卽於佛前。一心同聲。以偈頌曰。聖主天中王。迦陵頻伽聲。哀愍衆生者。我等今敬禮。世尊甚希有。久遠乃一現。一百八十劫。空過無有佛。三惡道充滿。諸天衆減少。今佛出於世。爲衆生作眼。世間所歸趣。救護於一切。爲衆生之父。哀愍饒益者。我等宿福慶。今得值世尊。爾時諸梵天王。偈讚佛已。各作是言。唯願世尊哀愍一切。轉於法輪。度脫衆生。時諸梵天王。一心同聲。而說偈言。大聖轉法輪。顯示諸法相。度苦惱衆生。令得大歡喜。衆生聞此法。得道若生天。諸惡道減少。忍善者增益。

爾時大通智勝如來默然許之。又。諸比丘。南方五百萬
億國土。諸大梵王。各自見宮殿光明照耀。昔所未有。
歡喜踊躍。生稀有心。卽各相詣。共議此事。以何因緣
。我等宮殿有此光曜。時彼衆中。有一大梵天王。名曰
妙法。爲諸梵衆。而說偈言。
我等諸宮殿。光明甚威曜。此非無因緣。是相宜求之。
過於百千劫。未曾見是相。爲大德天生。爲佛出世間。
爾時五百萬億諸梵天王。與宮殿俱。各以衣祴盛諸天華
。共詣北方。推尋是相。見大通智勝如來。處於道場菩
提樹下。坐師子座。諸天。龍王。乾闥婆。緊那羅。摩
睺羅伽。人非人。等。恭敬圍繞。及見十六王子請佛轉
法輪。時諸梵天王。頭面禮佛。繞百千匝。卽以天華而
散佛上。所散之華。如須彌山。并以供養佛菩提樹。華
供養已。各以宮殿。奉上彼佛。而作是言。唯見哀愍。
饒益我等。所獻宮殿。願垂納受。

爾時諸梵天王。卽於佛前。一心同聲。以偈頌曰。世尊甚難見。破諸煩惱者。過百三十劫。今乃得一見。諸飢渴衆生。以法雨充滿。昔所未曾覩。無量智慧者。如優曇鉢華。今日乃值遇。我等諸宮殿。蒙光故嚴飾。世尊大慈愍。惟願垂納受。

爾時諸梵天王。偈讚佛已。各作是言。唯願世尊轉於法輪。令一切世間。諸天。魔。梵。沙門。婆羅門。皆獲安隱。而得度脫。時諸梵天王。一心同聲。以偈頌曰。唯願天人尊。轉無上法輪。擊於大法鼓。而吹大法螺。普雨大法雨。度無量衆生。我等咸歸請。當演深遠音。爾時大通智勝如來默然許之。西南方。乃至下方。亦復如是。爾時上方五百萬億國土。諸大梵王。皆悉自覩所止宮殿。光明威曜。昔所未有。歡喜踊躍。生希有心。

卽各相詣。共議此事。以何因緣。我等宮殿。有斯光明。時彼衆中。有一大梵天王。名曰尸棄。爲諸梵衆而說偈言。

今以何因緣。我等諸宮殿。威德光明曜。嚴飾未曾有。如是之妙相。昔所未聞見。爲大德天生。爲佛出世間。

爾時五百萬億諸梵天王。與宮殿俱。各以衣祴盛諸天華。共詣下方。推尋是相。見大通智勝如來。處於道場菩提樹下。坐師子座。諸天。龍王。乾闥婆。緊那羅。摩睺羅伽。人非人。等。恭敬圍繞。及見十六王子請佛轉法輪。時諸梵天王頭面禮佛。繞百千匝。卽以天華而散佛上。所散之華。如須彌山。并以供養佛菩提樹。華供養已。各以宮殿。奉上彼佛。而作是言。唯見哀愍。饒益我等。所獻宮殿。願垂納處。時諸梵天王。卽於佛前。一心同聲。以偈頌曰。能於三界獄。勉出諸衆生。善哉見諸佛。救世之聖尊。能於三界獄。勉出諸衆生。

普智天人尊。哀愍羣萌類。能開甘露門。廣度於一切。
於昔無量劫。空過無有佛。世尊未出時。十方常暗冥。
三惡道增長。阿修羅亦盛。諸天衆轉減。死多墮惡道。
不從佛聞法。常行不善事。色力及智慧。斯等皆減少。
罪業因緣故。失樂及樂想。住於邪見法。不識善儀則。
不蒙佛所化。常墮於惡道。佛爲世間眼。久遠時乃出。
哀愍諸衆生。故現於世間。超出成正覺。我等甚欣慶。
及餘一切衆。喜歎未曾有。我等諸宮殿。蒙光故嚴飾。
今以奉世尊。唯垂哀納處。願以此功德。普及於一切。
我等與衆生。皆共成佛道。

爾時五百萬億諸梵天王。偈讚佛已。各白佛言。唯願世
尊轉於法輪。多所安隱。多所度脫。時諸梵天王而說偈
言。
世尊轉法輪。擊甘露法鼓。度苦惱衆生。開示涅槃道。
唯願受我請。以大微妙音。哀愍而敷演。無量劫集法。

爾時大通智勝如來。受十方諸梵天王。及十六王子請。卽時三轉十二行法輪。若沙門。婆羅門。若天。魔。梵。及餘世間所不能轉。謂是苦。是苦集。是苦滅。是苦滅道。及廣說十二因緣法。無明緣行。行緣識。識緣名色。名色緣六入。六入緣觸。觸緣受。受緣愛。愛緣取。取緣有。有緣生。生緣老死。憂悲苦惱。無明滅。則行滅。行滅。則識滅。識滅。則名色滅。名色滅。則六入滅。六入滅。則觸滅。觸滅。則受滅。受滅。則愛滅。愛滅。則取滅。取滅。則有滅。有滅。則生滅。生滅。則老死憂悲苦惱滅。

佛於天人大衆之中。說是法時。六百萬億那由他人。以不受一切法故。而於諸漏。心得解脫。皆得深妙禪定。以三明。六通。具八解脫。第二第三第四說法時。千萬億恆河沙那由他等衆生。亦以不受一切法故。而於諸漏。

心得解脫。從是已後。諸聲聞衆。無量無邊。不可稱數。爾時十六王子。皆以童子出家。而爲沙彌。諸根通利。智慧明了。已曾供養百千萬億諸佛。淨修梵行。求阿耨多羅三藐三菩提。俱白佛言。世尊。是諸無量千萬億大德聲聞。皆已成就。世尊。亦當爲我等說阿耨多羅三藐三菩提法。我等聞已。皆共修學。世尊。我等志願如來知見。深心所念。佛自證知。爾時轉輪聖王所將衆中。八萬億人。見十六王子出家。亦求出家。王卽聽許。爾時彼佛受沙彌請。過二萬劫已。乃於四衆之中。說是大乘經。名妙法蓮華。教菩薩法。佛所護念。說是經已。十六沙彌爲阿耨多羅三藐三菩提故。皆共受持。諷誦通利。說是經時。十六菩薩沙彌皆悉信受。聲聞衆中。亦有信解。其餘衆生。千萬億種。皆生疑惑。佛說是經。於八千劫。未曾休廢。說此經已。卽入靜室。住於禪定。八萬四千劫。未曾休廢。是時十六菩薩沙彌。知佛入室。寂然

禪定。各升法座。亦於八萬四千劫。爲四部衆。廣說分別妙法華經。一一皆度六百萬億那由他恆河沙等衆生。示教。利喜。令發阿耨多羅三藐三菩提心。大通智勝佛過八萬四千劫已。從三昧起。往詣法座。安詳而坐。普告大衆。是十六菩薩沙彌。甚爲希有。諸根通利。智慧明了。已曾供養無量千萬億數諸佛。於諸佛所。常修梵行。受持佛智。開示衆生。令入其中。汝等皆當數數親近而供養之。所以者何。若聲聞。辟支佛。及諸菩薩。能信是十六菩薩所說經法。受持不毀者。是人皆當得阿耨多羅三藐三菩提。如來之慧。

佛告諸比丘。是十六菩薩。常樂說是妙法蓮華經。一一菩薩。所化六百萬億那由他恆河沙等衆生。世所生。與菩薩俱。從其聞法。悉皆信解。以此因緣。得值四萬億諸佛世尊。于今不盡。諸比丘。我今語汝。彼佛弟子十六沙彌。今皆得阿耨多羅三藐三菩提。於十方國土。

現在說法。有無量百千萬億菩薩。聲聞。以爲眷屬。其二沙彌。東方作佛。一名阿閼。在歡喜國。二名須彌頂。東南方二佛。一名師子音。二名師子相。南方二佛。一名虛空住。二名常滅。西南方二佛。一名帝相。二名梵相。西方二佛。一名阿彌陀。二名度一切世間苦惱。西北方二佛。一名多摩羅跋耨檀香神通。二名須彌相。北方二佛。一名雲自在。二名雲自在王。東北方佛。名壞一切世間怖畏。第十六。我釋迦牟尼佛。於娑婆國土。成阿耨多羅三藐三菩提。

諸比丘。我等爲沙彌時。各各教化無量百千萬億恆河沙等衆生。從我聞法。爲阿耨多羅三藐三菩提。此諸衆生。于今有住聲聞地者。我常教化阿耨多羅三藐三菩提。是諸人等。應以是法。漸入佛道。所以者何。如來智慧。難信難解。爾時所化無量恆河沙等衆生者。汝等諸比丘。及我滅度後。未來世中聲聞弟子是也。我滅度後。

復有弟子。不聞是經。不知不覺菩薩所行。自於所得功德。生滅度想。當入涅槃。我於餘國作佛。更有異名。是人雖生滅度之想。入於涅槃。而於彼土。求佛智慧。得聞是經。唯以佛乘而得滅度。更無餘乘。除諸如來方便說法。

諸比丘。若如來自知涅槃時到。衆又清淨。信解堅固。了達空法。深入禪定。便集諸菩薩及聲聞衆。爲說是經。世間無有二乘而得滅度。唯一佛乘得滅度耳。比丘當知。如來方便。深入衆生之性。如其志樂小法。深著五欲。爲是等故。說於涅槃。是人若聞。則便信受。譬如五百由旬險難惡道。曠絕無人。怖畏之處。若有多衆。欲過此道。至珍寶處。有一導師。聰慧明達。善知險道通塞之相。將導衆人。欲過此難。所將人衆。中路懈怠。白導師言。我等疲極。而復怖畏。不能復進。前路猶遠。今欲退還。導師多諸方便。而作是念。此等可愍。

云何捨大珍寶而欲退還。作是念已。以方便力。於險道中。過三百由旬。化作一城。告衆人言。汝等勿怖。莫得退還。今此大城。可於中止。隨意所作。若入是城。快得安隱。若能前至寶所。亦可得去。是時疲極之衆。心大歡喜。歎未曾有。我等今者。免斯惡道。快得安隱。於是衆人前入化城。生已度想。生安隱想。爾時導師。知此人衆既得止息。無復疲倦。卽滅化城。語衆人言。汝等去來。寶處在近。向者大城。我所化作。爲止息耳。

諸比丘。如來亦復如是。今爲汝等作大導師。知諸生死煩惱惡道。險難長遠。應去應度。若衆生但聞一佛乘者。則不欲見佛。不欲親近。便作是念。佛道長遠。久受勤苦。乃可得成。佛知是心。怯弱下劣。以方便力。而於中道爲止息故。說二涅槃。若衆生住於二地。如來爾時卽便爲說。汝等所作未辦。汝所住地。近於佛慧。當

觀察籌量所得涅槃。非真實也。但是如來方便之力。於一佛乘。分別說三。如彼導師。爲止息故。化作大城。既知息已。而告之言。寶處在近。此城非實。我化作耳。

爾時世尊欲重宣此義。而說偈言。
大通智勝佛。十劫坐道場。佛法不現前。不得成佛道。
諸天神龍王。阿修羅衆等。常雨於天華。以供養彼佛。
諸天擊天鼓。并作衆伎樂。香風吹萎華。更雨新好者。
過十小劫已。乃得成佛道。諸天及世人。心皆懷踊躍。
彼佛十六子。皆與其眷屬。千萬億圍繞。俱行至佛所。
頭面禮佛足。而請轉法輪。聖師子法雨。充我及一切。
世尊甚難值。久遠時一現。爲覺悟羣生。震動於一切。
東方諸世界。五百萬億國。梵宮殿光曜。昔所未曾有。
諸梵見此相。尋來至佛所。散華以供養。并奉上宮殿。
請佛轉法輪。以偈而讚歎。佛知時未至。受請默然坐。

三方及四維。上下亦復爾。散華奉宮殿。請佛轉法輪。
世尊甚難值。願以大慈悲。廣開甘露門。轉無上法輪。
無量慧世尊。受彼衆人請。爲宣種種法。四諦十二緣。
無明至老死。皆從生緣有。如是衆過患。汝等應當知。
宣暢是法時。六百萬億姪該。得盡諸苦際。皆成阿羅漢。
第二說法時。千萬恆沙衆。於諸法不受。亦得阿羅漢。
從是後得道。其數無有量。萬億劫算數。不能得其邊。
時十六王子。出家作沙彌。皆共請彼佛。演說大乘法。
我等及營從。皆當成佛道。願得如世尊。慧眼第一淨。
佛知童子心。宿世之所行。以無量因緣。種種諸譬喻。
說六波羅蜜。及諸神通事。分別真實法。菩薩所行道。
說是法華經。如恆河沙偈。彼佛說經已。靜室入禪定。
一心一處坐。八萬四千劫。是諸沙彌等。知佛禪未出。
爲無量億衆。說佛無上慧。各各坐法座。說是大乘經。
於佛宴寂後。宣揚助法化。一一沙彌等。所度諸衆生。

有六百萬億。恆河沙等衆。彼佛滅度後。是諸聞法者。在在諸佛土。常與師俱生。是十六沙彌。具足行佛道。今現在十方。各得成正覺。爾時聞法者。各在諸佛所。其有住聲聞。漸教以佛道。我在十六數。曾亦爲汝說。是故以方便。引汝趣佛慧。以是本因緣。今說法華經。令汝入佛道。慎勿懷驚懼。譬如險惡道。迴絕多毒獸。又復無水草。人所怖畏處。無數千萬衆。欲過此險道。其路甚曠遠。經五百由旬。時有一導師。強識有智慧。明了心決定。在險濟衆難。衆人皆疲倦。而白導師言。我等今頓乏。於此欲退還。導師作是念。此輩甚可愍。如何欲退還。而失大珍寶。尋時思方便。當設神通力。化作大城郭。莊嚴諸舍宅。周帀有園林。渠流及浴池。重門高樓閣。男女皆充滿。卽作是化已。慰衆言勿懼。汝等入此城。各可隨所樂。諸人旣入城。心皆大歡喜。皆生安隱想。自謂已得度。導師知息已。集衆而告言。汝等當前進。此是化城耳。我見汝疲極。中路欲退還。

故以方便力。權化作此城。汝今勤精進。當共至寶所。
我亦復如是。爲一切導師。見諸求道者。中路而懈廢。
不能度生死。煩惱諸險道。故以方便力。爲息說涅槃。
言汝等苦滅。所作皆已辦。既知到涅槃。皆得阿羅漢。
爾乃集大衆。爲說真實法。諸佛方便力。分別說三乘。
唯有一佛乘。息處故說二。今爲汝說實。汝所得非滅。
爲佛一切智。當發大精進。汝證一切智。十力等佛法。
具三十二相。乃是真實滅。諸佛之導師。爲息說涅槃。
既知是息已。引入於佛慧。

妙法蓮華經卷三終

三根普潤。分弟子蒙恩。化城虛設莫爲真。再觀智勝因。
。十六至孫。八面證金身。

南無法華會上佛菩薩。三稱

持驗記

○隋天台修禪寺智者大師。諱顓。姓陳氏。潁川人。母夢香烟五采。縈迴入懷。誕靈之夕。神光照屋。七歲入果願寺。聞僧授普門品。一徧輒記。宛如夙習。十七禮佛像。誓志出家。恍焉如夢。見巖崖萬重。雲日半垂。滄海泓澄。乃在山下。峯頂有僧招手。須臾伸臂。挽師入伽藍云。汝當居此。十八出家。詣大賢山。誦法華。無量義。普賢觀等。歷二旬。誦通三部。陳天嘉元年。聞思大禪師。止大蘇山。卽往頂拜。思曰。昔日靈山。同聽法華。宿緣所追。今復來矣。因示以普賢道場。爲說四安樂行。師入觀二七日。誦法華經。至藥至品。是真精進。是名眞法供養如來。身心豁然。寂而入定。乃見靈山一會。儼然未散。宿通潛發。以所證堵思。南嶽歎曰。非汝莫證。非我莫識。所入定者。法華三昧前方便。所發持者。初陀羅尼也。縱令文字之師千萬。不能窮汝辯矣。大建元年。至

金陵瓦官。開法華經題。帝敕停朝一日。令羣臣往聽。師將息緣天台。見佛隴南峯。卽徘徊留意。先是神僧定光。居此峯三十載。至光謂曰。頗憶招手相引是。否。師因悟禮像之徵。乃於北峯創立伽藍。植松引流。宛若昔夢。寺北別峯名華頂。獨往頭陀。自後般若天發。大闡法華。天台瀕海。民業漁捕。師心憫之。以所得覲施。買海曲爲放生池。表聞陳主。敕禁採捕。師爲講光明經。漁者聞法。皆好生去殺。合江溪簷梁六十三所。三百餘里。俱成法池。開皇十二年。於當陽玉泉山。創立精舍。武安王開聖父子顯靈乞戒。求爲護法弟子。師著法華玄義等書。爲陳隋二代大法王師。十七年冬。將入滅。命侍者唱法華無量壽經。爲最後聞思。聽法華竟。贊曰。法門父母。慧解繇生。本述曠大。微妙難測。輟斤絕絃。於今日矣。聽無量壽竟。贊曰。四十八願。莊嚴淨土。華池寶樹。易往無人。火車相現。能改悔者。尚得往生。況戒慧熏

修。行道力故。實不唐捐。梵迫聲相。實不誑人。當
唱經時。吳州侍官張達等。並闔寺僧俗大衆。咸見大
佛倍大石尊。光明滿山。直入房內。諸僧或得瑞夢。
或見奇相。雖復處異。而同是此時。唱經竟。索香湯
漱口。說十如。四不生十法界。三觀。四無量心。四
悉檀。四諦。十二因緣。六波羅蜜。一一法門。皆能
通心到清涼池。智朗法師請云。伏願慈留。賜釋餘疑
。不悉何位。歿此何生。誰可宗仰。報曰。汝等懶種
善根。問仔功德。如盲問乳。蹶者訪路。告實何益。
由諸慵悞。故喜怒呵讚。既不自省。倒見譏嫌。吾今
不久。當爲此輩。破除疑謗。觀心論已解。今天報汝
。否不領衆。必淨六根。爲他捐已。只是五品位耳。
汝問何生者。花整世界。吾諸師友。侍從觀音。皆來
迎我。問誰可宗仰。豈不曾聞波羅提木。又是汝之師。
吾常說四種三昧。是汝明導。教汝捨重擔。降三毒。
治四大。解業縛。調禪味。破魔軍。遠邪濟。折慢幢。

等。唯此大師。能作依止。與汝等因法相遇。以法爲親。傳習佛燈。是爲眷屬。若不能者。傳習魔燈。非吾徒也。誠維那曰。人命將終。聞鍾磬聲。增其正念。唯長唯久。氣盡爲期。云何身冷。方復響磬。世間哭泣著服。皆不應爲。言訖跏趺。唱三寶名。如入三昧。爾聆祥雲靉靄。天樂鳴空。八音遠震。遐邇咸聞。經時方寂。以隋開皇十七年十一月二十日未時入滅。春秋六十。僧夏四十。至於子時。頂上猶煖。雖復不許哀號。門人哽戀。心沒憂海。不能自喻。日隱舟沈。永無憑仰。跏趺露坐。恭候揚州晉王來山。道俗奔赴。號繞泣拜。散花燒香。至來製造沈香大龕。大稿師升坐龕內。流汗徧身。綿帛掩拭。沾濡若流。王問章安法師云。本師理當建塔何地。安曰。先師在日。每坐佛隴右峯。似有所愛之意。王卽然之。嚴飾宮殿。建塔藏龕。旣而歸佛隴。連雨不休。弟子呪願。願賜威神。纔動泥洹之輿。應手雲開。風噪松悲。泉

奔水咽。道俗弟子。侍從靈儀。還遺囑之地。寶龕入塔之時。天雨香花。繽紛而下。向塔所求者。如谷答響。種種靈應。詳如國清百錄等傳。銑法師云。大師所造有爲功德。造寺三十六所。書寫大藏經十五藏。親手度僧一萬四千餘人。造栴檀金銅漆畫佛菩薩像八十萬軀。傳法弟子三十二人。得法自行者不可稱數。佛隴真覺寺。在天台縣北二十里。金地嶺上。大隋開皇十七年。晉王爲智者大師建塔藏龕。號定慧真身塔院。有繪像與所賜方袍。宋建隆初。錢忠懿王。與大師十五世法嗣。曦寂法師。重建院子。祥符元年。勅賜真覺寺額。宏傳戒法。大開講筵。明隆慶時。二十世法嗣真稔法師。重新佛殿僧房。大振宗風。至清光緒六年。武林許觀察靈虛。貴州李明府芷卿。湖南魏刺史槃仲。天台縣主楊昌珠。請大師四十世孫敏曦。募緣修塔造寺。至十五年己丑春。開壇傳戒。念佛講經。爲大師祝嘏法筵。每年春夏。傳戒講經。以爲

定例云。

○隋仁壽元年辛酉。普曜寺沙門上行。請北天竺國闍那崛多法師。南天竺國達摩笈多法師。於大興善寺。重譯此經爲八卷。名添品妙法蓮華經。於晉泰譯本添普門品後偈頌。藥王品後補日光喻之全文。

○隋釋慧威。江陵人。少依南嶽行法華三昧。專思玄寂。遂得解一切衆生語言陀羅尼。聞人畜禽鳥聲。輒知其音。後又發證神通。飛空履水。如步平地。密行殊常。人莫能測。

○隋天台國清寺釋灌頂。姓吳。臨海章安人。生甫三月。能隨母稱三寶名。七歲出俗。日記萬言。二十遑進具。謁智者稟受觀法。研繹旣久。頓蒙印可。後隋智者至金陵光宅。聽講法華。又於江陵玉泉。受法華玄義及止觀。晚止會稽稱心精舍。講說法華。時有跨朗籠基。超雲邁印之語。貞觀六年八月示寂。室有異香。師化流囂俗。神用無方。每誦經宴坐。常有天花飄

墜其側。村人于法龍。去山三十里。染患將絕。其子
馳至祈救。師爲轉法華經。焚栴檀香。病者遙聞香氣
入鼻。應時痊愈。又樂安南嶺。地曰安洲。碧樹清溪
。泉流伏溺。人逕不通。師留連愛翫。顧而誓曰。若
使斯地坦平。當來此講經。曾未浹旬。白沙徧涌。平
如玉鏡。乃講法華金光以答靈惠。
○隋釋智晞。穎川陳氏。童年出俗。至台山智者所。稟
受禪訣。帖修寂定。常居佛隴修禪道場。行法華三昧
。時欲構香臺。香爐峯林木秀異。師欲伐用。衆以神
所據爲疑。夜夢神送疏云。香爐峯檉柏樹。盡捨給經
臺。遂伐之。有僧法雲。欲往峯頂禪坐。師止之曰。
卿道力微弱。山神剛猛。不宜往。雲不從。甫一夕。
神現形驅令還。方悟前旨。深生敬仰。師嘗往阿育王
寶塔。禮八萬四千拜。貞觀元年。跏趺端坐。仍執如
意說法。弟子問當生何所。答云。如吾見夢。當在兜
率。儼然如入禪定。空中有絃管聲。良久乃息。

○隋黃州濟華寺釋玄秀。恆誦法華。每有異相。時當炎暑。師方誦經次。寺僧見翊衛嚴肅。佈告同侶。共視如初。上望空中。填塞無際。四衆咸稱神異。

○隋釋法安。止建元寺。博通玄要。長誦法華。講四十餘徧。忽於講座四隅。生花一叢。有十餘枝。黃白相閒。狀似蓮華。香花敷蘊。又經旬日。復於都講牀側。及大衆坐處。生八九華。一月方萎。道俗聚觀。歎爲奇瑞。

○隋釋智休璪。臨海張氏二十卽登天台。參智者大師求出家。智者令誦法華。兼修三昧。至二七日夜懺訖。見九頭龍從地涌出。上升虛空。天明白問。智者曰。此表九道衆生。聞法華經。將來之世。破無明。入法性空耳。後移住寶林寺。專修法華三昧。初夜卽有鬼搖撼戶扇。三七日中。每夜如是。以至搥柱破壁。滅燈現狀。師一無所動。哩坐禪誦經而已。第三七日畢。見一青衣童子讚曰。善哉。言訖遂滅。

○隋廬山福林寺釋大志。會稽顧氏。髻齡出家。師事天台智者。開皇十年。來遊廬嶽。住華頂寺。誦法華經。索然閒靜。音聲清轉。衆皆樂聞。後於甘露峯前。建靜觀道場。頭陀爲業。子爾一身。不避虡虎。每投身飼之。虎皆避去。

○隋益州招提寺釋慧恭。與同學僧慧遠結契。後遊荊揚。訪詭而歸。契闊三十年。夜話次。遠語如流。師默無所對。遠曰。仁者無所得耶。師曰。性闇無解。遠曰。可不誦一經乎。師曰。唯誦法華普門品一卷。當爲誦之。但至心聽。乃結壇升高座。始發聲唱經題。覺有香氣。久之聞天樂振空。雨華零亂。經已方歇。遠敬謝之。

○隋釋法朗。南陽許氏。棲止無定。多住鄂州。時邁誦讀諸經。志專法華。潔誓誦之。一坐七徧。如是良久。聲如雷動。遠迎亮徹。世因目爲法華朗焉。有比丘尼爲鬼所著。超悟玄解。莫不稱爲聰悟。師曰。此邪

○鬼也。厲聲呵之。魅卽怖去。霍然如失。隋雍州釋法喜。襄陽李氏。七歲出俗。志持法華。仁壽中。住京師禪定寺。欲冥祈靈爽。誓誦蓮經千徧。因不止舊室。巡繞梵誦。數滿八百。誓心不散。同寺僧忽見有寶車瓔珞。入師房內。迫而觀之。了無所睹。方知幽通之感。